

四庫全書薈要

• 乾隆御覽本

史部

欽定四庫全書薈要

史部

吳志卷三

詳校官內閣侍讀臣孫球



吳志卷三

晉著作郎巴西中正安漢陳壽撰

宋太中大夫國子博士聞喜裴松之注

孫亮 孫休 孫皓

孫亮字子明權少子也權春秋高而亮最少故尤留意
姊全公主嘗譖太子和子母心自不安因倚權意欲豫
自結數稱述全尚女勸為亮納赤烏十三年和廢權遂

立亮為太子以金氏為妃太元元年夏亮母潘氏立為

皇后冬權寢疾徵大將軍諸葛恪為太子太傅會稽太

守滕胤為太常並受詔輔太子明年四月權薨太子即

尊號大赦改元是歲於魏嘉平四年也閏月以恪為帝

太傅胤為衛將軍領尚書事上大將軍呂岱為大司馬

諸文武在位皆進爵班賞冗官加等冬十月太傅恪率

軍遏巢湖

巢音祖了反

城東興使將軍全端守西城都尉留

略守東城十二月朔丙申大風雷電魏使將軍諸葛誕

胡遵等步騎七萬圍東興將軍王昶攻南郡毋丘儉向
武昌甲寅恪以大兵赴敵戊午兵及東興交戰大破魏
軍殺將軍韓綜桓嘉等是月雷雨天災武昌端門改作
端門又災內殿臣松之案孫權赤烏十年詔徙武昌宮
材瓦以繕治建康宮而此猶有端門內
殿吳錄云諸葛恪有遷都意更
起武昌宮今所災者恪所新作

二年春正月丙寅立皇后全氏大赦庚午王昶等皆退
二月軍還自東興大行封賞三月恪率軍伐魏夏四月
圍新城大疫兵卒死者大半秋八月恪引軍還冬十月

大饗武衛將軍孫峻伏兵殺恪於殿堂大赦以峻為丞相封富春侯十一月有大鳥五見於春申明年改元

五鳳元年夏大水秋吳侯英謀殺峻覺英自殺冬十一

月星茀於斗牛

江表傳曰是歲交趾稗草化為稻

二年春正月魏鎮東將軍毋丘儉前將軍文欽以淮南之衆西入戰於樂嘉閏月壬辰峻及驃騎將軍呂據左將軍留贊率兵襲壽春軍及東興聞欽等敗壬寅兵進於橐臬欽詣峻降淮南餘衆數萬口來奔魏諸葛誕入

壽春峻引軍還二月及魏將軍曹珍遇於高亭交戰珍
敗績留贊為誕別將蔣班所敗於菰陂贊及將軍孫楞
蔣修等皆遇害三月使鎮南將軍朱異襲安豐不克秋
七月將軍孫儀張怡林恂等謀殺峻發覺儀自殺恂等
伏辜陽羨離里山大石自立使衛尉馮朝城廣陵拜將
軍吳穰為廣陵太守留略為東海太守是歲大旱十二
月作太廟以馮朝為監軍使者督徐州諸軍事民饑軍
士怨畔

太平元年春

吳歷曰正月為權立廟稱太祖廟

二月朔建業火峻用征

北大將軍文欽計將征魏八月先遣欽及驃騎呂據車

騎劉纂鎮南朱異前將軍唐咨軍自江都入淮泗九月

丁亥峻卒以從弟偏將軍絺為侍中武衛將軍領中外

諸軍事召還據等聞絺代峻大怒己丑大司馬呂岱卒

壬辰太白犯南斗據欽咨等表薦衛將軍滕胤為丞相

絺不聽癸卯更以胤為大司馬代呂岱駐武昌據引兵

還欲討絺絺遣使以詔書告喻欽咨等使取據冬十月

丁未遣孫憲及丁奉施寬等以舟兵逆據於江都遣將軍劉丞督步騎攻脣脣兵敗夷滅己酉大赦改元辛亥獲呂據於新州十一月以綝為大將軍假節封永康侯孫憲與將軍王惲謀殺綝事覺綝殺惲迫憲令自殺十二月使五官中郎將刁玄告亂於蜀

二年春二月甲寅大雨震電乙卯雪大寒以長沙東部為湘東郡西部為衡陽郡會稽東部為臨海郡豫章東部為臨川郡夏四月亮臨正殿大赦始親政事綝所表

奏多見難問又科兵子弟年十八已下十五已上得三千餘人選大將子弟年少有勇力者為之將帥亮曰吾

立此軍欲與之俱長日於苑中習焉

吳歷曰亮數出中書視孫權舊事問

左右侍臣先帝數有特制今大將軍問事但令我書可邪亮後出西苑方食生梅使黃門至中藏取蜜漬梅蜜中有鼠矢召問藏吏藏吏叩頭亮問吏曰黃門從汝求蜜邪吏曰向求實不敢與黃門不服侍中刁玄張邵啓黃門藏吏辭語不同請付獄推盡亮曰此易知耳令破鼠矢矢裏燥亮大笑謂玄邵曰若矢先在蜜中中外當俱濕今外濕裏燥必是黃門所為黃門首服左右莫不驚悚江表傳曰亮使黃門以銀碗并蓋就中藏吏取交州所獻甘蔗錫黃門先恨藏吏以鼠矢投錫中啓言藏吏不謹亮呼吏持錫器入問曰此器既蓋之且有掩覆

無緣有此黃門將有恨於汝邪吏叩頭曰嘗從某求宮中莞席宮席有數不敢與亮曰必是此也覆問黃門具首伏即於目前加髭鞭斥付外署臣松之以為鼠矢新者亦表裏皆濕黃門取新矢則無以得其奸也緣遇燥矢故成亮之慧然猶謂吳歷五月魏征東大將軍諸葛此言不如江表傳為實也

誕以淮南之衆保壽春城遣將軍朱成稱臣上疏又遣子靚長史吳綱諸牙門子弟為質六月使文欽唐咨全端等步騎二萬救誕朱異自虎林率衆襲夏口夏口督孫壹奔魏秋七月絀率衆救壽春次於鏌里朱異至自夏口絀使異為前部督與丁奉等將介士五萬解圍八

月會稽南部反殺都尉鄱陽新都民為亂廷尉丁密步
兵校尉鄭曹將軍鍾離牧率軍討之朱異以軍士乏食
引還緄大怒九月朔己巳殺異於鑊里辛未緄自鑊里
還建業甲申大赦十一月全緒子禕儀以其母奔魏十
二月全端懌等自壽春城詣司馬文王

三年春正月諸葛誕殺文欽三月司馬文王克壽春誕
及左右戰死將吏已下皆降秋七月封故齊王奮為章
安侯詔州郡伐宮材自八月沈陰不雨四十餘日亮以

緄專恣與太常全尚將軍劉丞謀誅緄九月戊午緄以
兵取尚遣弟恩攻殺丞於蒼龍門外召大臣會宮門黜
亮為會稽王時年十六

孫休字子烈權第六子年十三從中書郎射慈郎中盛
冲受學大元二年正月封琅邪王居虎林四月權薨休
弟亮承統諸葛恪秉政不欲諸王在濱江兵馬之地徙
休於丹陽郡太守李衡數以事侵休休上書乞徙他郡
詔徙會稽居數歲夢乘龍上天顧不見尾覺而異之孫

亮廢已未孫綝使宗正孫楷與中書郎董朝迎休休初
聞問意疑楷朝具述綝等所以奉迎本意留一日二夜
遂發十月戊寅行至曲阿有老公于休叩頭曰事久變
生天下喁喁願陛下速行休善之是日進及布塞亭武
衛將軍恩行丞相事率百僚以乘輿法駕迎於永昌亭
築宮以武帳為便殿設御坐己卯休至望便殿止住使
孫楷先見恩楷還休乘輦進羣臣再拜稱臣休升便殿
謙不即御坐止東廂戶曹尚書前即階下讚奏丞相奉

璽符休三讓羣臣三請休曰將相諸侯咸推寡人寡人
敢不承受璽符羣臣以次奉引休就乘輿百官陪位絀
以兵千人迎於半野拜於道側休下車答拜即日御正
殿大赦改元是歲於魏甘露三年也

永安元年冬十月壬午詔曰夫褒德賞功古今通義其
以大將軍絀為丞相荊州牧增食五縣武衛將軍恩為
御史大夫衛將軍中軍督封縣侯威遠將軍授為右將
軍縣侯偏將軍幹雜號將軍亭侯長水校尉張布輔導

勤勞以布為輔義將軍封永康侯董朝親迎封為鄉侯

又詔曰丹陽太守李衡以往事之嫌自拘有司夫射鉤

斬祛在君為君遣衡還郡勿令自疑

襄陽記曰衡字叔平本襄陽卒家子

也漢末入吳為武昌庶民聞羊衡有人物之鑒往干之
衡曰多事之世尚書劇曹郎才也是時校事郎呂壹操
弄權柄大臣畏憚莫有敢言衡曰非李衡無能困之者
遂共薦為郎權引見衡口陳壹奸短數千言權有愧色
數月壹被誅而衡大見顯擢後常為諸葛恪司馬幹恪
府事恪被誅求為丹陽太守時孫休在郡治衡數以法
繩之妻習氏每諫衡不從會休立衡憂懼謂妻曰不
用卿言以至於此遂欲奔魏妻曰不可君本庶民耳先
帝相拔過重既數作無禮而復逆自猜嫌逃叛求活以
此北歸何面見中國人乎衡曰計何所出妻曰琅邪王

素好善慕名方欲自顯於天下終不以私嫌殺君明矣
可自囚詣獄表列前失顯求受罪如此乃當逆見優饒
非但直活而已衡從之果得無患又加威遠將軍授以
榮戟衡每欲治家妻輒不聽後密遣客十人於武陵龍
陽汎洲上作宅種柑橘千株臨死勅兒曰汝母惡吾治
家故窮如是然吾州里有千頭木奴不責汝衣食歲上
一匹絹亦可足用耳衡亡後二十餘日兒以白母母曰
此當是種柑橘也汝家失十戶客來七八年必汝父遣
為宅汝父恒稱太史公言江陵千樹橘當封君家吾答
曰且人患無德義不患不富若貴而能貧方好耳用此
何為吳末衡柑橘成歲得絹數千匹家
道殷足晉咸康中其宅上枯樹猶在

已丑封孫皓為

烏程侯皓弟德錢唐侯謙永安侯

江表傳曰羣臣奏立
皇后太子詔曰朕以

寡德奉承洪業蒞事日淺恩澤未敷加后妃之號
嗣子之位非所急也有司又固請休謙虛不許

十一

月甲午風四轉五復蒙霧連日絀一門五侯皆典禁兵
權傾人主有所陳述敬而不違於是益恣休恐其有變
數加賞賜丙申詔曰大將軍忠敬內發首建大計以安
社稷卿士內外咸贊其議並有勲勞昔霍光定計百僚
同心無復是過亟案前日與議定策告廟人名依故事
應加爵位者促施行之戊戌詔曰大將軍掌中外諸軍
事事統煩多其加衛將軍御史大夫恩侍中與大將軍
分省諸事壬子詔曰諸吏家有五人三人兼重為役父

兄在都子弟給郡縣吏既出限米軍出又從至於家事
無經護者朕甚愍之其有五人三人為役聽其父兄所
欲留為留一人除其米限軍出不從又曰諸將吏奉迎
陪位在永昌亭者皆加位一級頃之休聞絀逆謀陰與
張布圖計十二月戊辰臘百僚朝賀公卿升殿詔武士
縛絀即日伏誅已巳詔以左將軍張布討姦臣加布為
中軍督封布弟惇為都亭侯給兵三百人惇弟恂為校
尉詔曰古者建國教學為先所以道世治性為時養器

也自建興以來時事多故吏民頗以目前趨務去本就末不循古道夫所尚不淳則傷化敗俗其案古置學官立五經博士核取應選加其寵祿科見吏之中及將吏子弟有志好者各令就業一歲課試差其品第加以位賞使見之者樂其榮聞之者羨其譽以敦王化以隆風俗

二年春正月震電三月備九卿官詔曰朕以不德託於王公之上夙夜戰戰忘寢與食今欲偃武修文以崇大

化推此之道當由士民之贍必須農桑管子有言倉廩實知禮節衣食足知榮辱夫一夫不耕有受其饑一婦不織有受其寒饑寒並至而民不為非者未之有也自頃年以來州郡吏民及諸營兵多違此業皆浮船長江賈作上下良田漸廢見穀日少欲求大定豈可得哉亦由租入過重農人利薄使之然乎今欲廣開田業輕其賦稅差科彊羸課其田畝務令優均官私得所使家給戶贍足相供養則愛身重命不犯科法然後刑罰不用

風俗可整以羣僚之忠賢若盡心於時雖太古盛化未可卒致漢文升平庶幾可及及之則臣主俱榮不及則損削侵辱何可從容俯仰而已諸卿尚書可共咨度務取便佳田桑已至不可後時事定施行稱朕意焉

三年春三月西陵言赤烏見秋用都尉嚴密議作浦里塘會稽郡謠言王亮當還為天子而亮宮人告亮使巫禱祠有惡言有司以聞黜為候官侯遣之國道自殺衛

送者伏罪

吳錄曰或云休鵠殺之至晉太康中吳故少府丹陽戴顓迎亮喪葬之賴鄉

以會

稽南郡為建安郡分宜都置建平郡

吳歷曰是歲得大鼎于建德縣

四年夏五月大雨水泉涌溢秋八月遣光祿大夫周奕

石偉巡行風俗察將吏清濁民所疾苦為黜陟之詔

楚國

先賢傳曰石偉字公操南郡人少好學修節不急介然
獨立有不可奪之志舉茂才賢良方正皆不就孫休即
位特徵偉累遷至光祿勳及皓即位朝政昏亂偉乃辭
老耄痼疾乞身就拜光祿大夫吳平建威將軍王戎親
詣偉太康二年詔曰吳故光祿大夫石偉秉志清白皓
首不渝雖處危亂廉節可紀年已過邁不堪遠涉其以
偉為議郎加二千石秩以終厥世偉乃陽

狂及盲不受晉爵年八十三太熙元年卒

九月布山言

白龍見是歲安吳民陳焦死埋之六日更生穿土中出

五年春二月白虎門北樓災秋七月始新言黃龍見八月壬午大雨震電水泉涌溢乙酉立皇后朱氏戊子立

子暉為太子大赦

吳錄載休詔曰人之有名以相紀別長為作字憚其名耳禮名子欲令難

犯易避五十稱伯仲古或一字今人競作好名好字又令相配所行不副此替字伯明者也孤常哂之或師友父兄所作或自己為師友尚可父兄猶非自為最不謙孤今為四男作名字太子名暉暉音如湖水灣澳之灣字箇箇音如迄今之迄次子名暉暉音如兕觥之觥字弄弄音如立礪首之礪次子名鉅鉅音如草莽之莽字暉音如舉物之舉次子名寇寇音如襖衣下寬大之襖字熒熒音如有所擁持之擁此都不與世所用者同故鈔舊文會合作之夫書八體損益因事而生今造此名字既不相配又字但一庶易棄避其普告天下便成

聞知臣松之以為傳稱名以制義義以出禮禮以體政以治民是以政成而民則易則生亂斯言之作豈虛也哉然欲令難犯何患無名而乃造無況之字制不典之音違明誥於前修每嗤駭於後代不亦異乎是以墳土未乾而妻子絕滅師服之言於是乎徵矣

冬十月以衛將軍濮陽興為丞

相廷尉丁密光祿勳孟宗為左右御史大夫休以丞相興及左將軍張布有舊恩委之以事布典宮省興關軍國休銳意於典籍欲畢覽百家之言尤好射雉春夏之間常晨出夜還唯此時舍書休欲與博士祭酒韋曜博士盛冲講論道藝曜冲素皆切直布恐入侍發其陰失

令已不得專因妄飾說以拒遏之休答曰孤之涉學羣書略徧所見不少也其明君闇主奸臣賊子古今賢愚成敗之事無不覽也今曜等入但欲與論講書耳不為從曜等始更受學也縱復如此亦何所損君特當以曜等恐道臣下奸變之事以此不欲令入耳如此之事孤已自備之不須曜等然後乃解也此都無所損君意特有所忌故耳布得詔陳謝重自序述又言懼妨政事休答曰書籍之事患人不好好之無傷也此無所為非而

君以為不宜是以孤有所及耳王務學業其流各異不相妨也不圖君今日在事更行此於孤也良所不取布拜表叩頭休答曰聊相關悟耳何至叩頭乎如君之忠誠遠近所知往者所以相感今日之巍巍也詩云靡不有初鮮克有終終之實難君其終之初休為王時布為左右將督素見信愛及至踐阼厚加寵待專擅國勢多行無禮自嫌瑕短懼曜沖言之故尤患忌休雖解此旨心不能悅更恐其疑懼竟如布意廢其講業不復使沖

等入是歲使察戰到交趾調孔爵大豬

臣松之案察戰吳官號今楊都

有察

戰巷

六年夏四月泉陵言黃龍見五月交趾郡吏呂興等反殺太守孫諝諝先是科郡上手工千餘人送建業而察戰至恐復見取故興等因此扇動兵民招誘諸夷也冬十月蜀以魏見伐來告癸未建業石頭小城火燒西南百八十丈甲申使大將軍丁奉督諸軍向魏壽春將軍留平別詣施績於南郡議兵所向將軍丁封孫異如沔

中皆救蜀蜀主劉禪降魏問至然後罷呂興既殺孫譚
使使如魏請太守及兵丞相興建取屯田萬人以為兵
分武陵為天門郡

吳歷曰是歲青龍見于長沙白
燕見于慈胡赤雀見于豫章

七年春正月大赦二月鎮軍陸抗撫軍步協征西將軍
留平建平太守盛曼率衆圍蜀巴東守將羅憲夏四月
魏將新附督王稚浮海入句章略長吏賞林及男女二
百餘口將軍孫越微得一船獲三十人秋七月海賊破
海鹽殺司鹽校尉駱秀使中書郎劉川發兵廬陵豫章

民張節等為亂衆萬餘人魏使將軍胡烈步騎二萬侵

西陵以救羅憲陸抗等引軍退復分交州置廣州士午

大赦癸未休薨

江表傳曰休寢疾口不能言乃手書呼丞相濮陽興入令子寧出拜之休把興

臂而指寧以託之

時年三十諡曰景皇帝

葛洪抱朴子曰吳景帝時成將于廣陵掘

諸冢取版以治城所壞甚多復發一大冢內有重閣戶扇皆樞轉可開閉四周為徹道通車其高可以乘馬又鑄銅為人數十枚長五尺皆大冠朱衣執劍列侍靈座皆刻銅人背後石壁言殿中將軍或言侍郎常侍似公王之冢破其棺棺中有人髮已班白衣冠鮮明面體如生人棺中雲母厚尺許以白玉璧三十枚藉尸兵人輩共舉出死人以倚冢壁有一玉長一尺許形似冬瓜從死人懷中透出墮地兩耳及鼻孔中皆有黃金如棗許

大此則骸骨有假
物而不朽之効也

孫皓字元宗權孫和子也一名彭祖字皓宗孫休立封
皓為烏程侯遣就國西湖民景養相皓當大貴皓喜
而不敢泄休薨是時蜀初亡而交趾攜叛國內震懼貪
得長君左典軍萬彧昔為烏程令與皓相善稱皓才識
明斷是長沙桓王之疇也又加之好學奉遵法度屢言
之於丞相濮陽興左將軍張布興布說休妃太后朱欲
以皓為嗣朱曰我寡婦人安知社稷之慮苟吳國無隕

宗廟有賴可矣於是遂迎立皓時年二十三改元大赦
是歲於魏咸熙元年也

元興元年八月以上大將軍施續大將軍丁奉為左右
大司馬張布為驃騎將軍加侍中諸增位班賞一皆如
舊九月貶太后為景皇后追諡父和曰文皇帝尊母何
為太后十月封休太子暉為豫章王次子汝南王次子
梁王次子陳王立皇后滕氏

江表傳曰皓初立發優詔恤士民開倉廩振貧乏科

出宮女以配無妻禽獸擾于苑者皆放之當時翕然稱為明主

皓既得志麇覲驕盈多

忌諱好酒色大小失望興布竊悔之或以譖皓十一月

誅興布十二月孫休葬定陵封后父滕牧為高密侯

吳歷

曰牧本名密避丁密改名牧丁密避牧改名為固

舅何洪等三人皆列侯是歲

魏置交阯太守之郡晉文帝為魏相國遣昔吳壽春城

降將徐紹孫或銜命齎書陳事勢利害以申喻皓

漢晉春秋

載晉文王與皓書曰聖人稱有君臣然後有上下禮義是故大必字小小必事大然後上下安服羣生獲所逮至末塗純德既毀勦民之命以爭彊於天下違禮順之至理則仁者弗由也方今主上聖明覆幬無外僕備位宰輔屬當國重唯華夏永殊方隅地裂六十餘載金革亟動無年不戰暴骸喪元困悴罔定每用悼心坐以待

旦將欲止戈興仁為百姓請命故分命偏師平定蜀漢
役未經年全軍獨克於時猛將謀夫朝臣庶士咸以奉
天時之宜就既征之軍藉吞敵之勢宜遂回旗東指以
臨吳境舟師泛江順流而下陸軍南轅取徑四部兼成
都之械漕巴漢之粟然後以中軍整旅二方雲會未及
浹辰可使江表底平南夏順軌然國朝深惟伐蜀之舉
雖有靜難之功亦悼蜀民獨罹其害戰於綿竹者自元
帥以下並受斬戮伏尸蔽地血流丹野一之於前猶追
恨不悉況重之於後乎是故旋師按甲思與南邦共全
百姓之命夫料力忖勢度資量險遠考古昔廢興之理
近鑒西蜀安危之効隆德保祚去危即順屈己以寧四
海者仁哲之高致也履危偷安隕德覆祚而不攝於後
世者非智者之所居也今朝廷遣徐紹孫或獻書喻懷
若書御於前必少留意回慮草茅結歡弭兵共為一家
惠於吳會施及中土豈不泰哉此昭心之大願也敢不
承受若不獲命則普天率土期於大同雖重干戈固不

獲已也

甘露元年三月皓遣使隨紹或報書曰知以高世之才
處宰輔之任漸導之功勤亦至矣孤以不德階承統緒
思與賢良共濟世道而以壅隔未有所緣嘉意允著深
用依依今遣光祿大夫紀陟五官中郎將弘璆宣明至

懷

江表傳曰皓書兩頭言白稱名言而不著姓吳錄曰陟字子上丹陽人初為中書郎孫峻使詰南陽王和

令其引分陟密使令正辭自理峻怒陟懼閉門不出孫
休時父亮為尚書令而陟為中書令每朝會詔以屏風
隔其座出為豫章太守千寶晉紀曰陟璆奉使如魏入
境而問諱入國而問俗壽春將王布示之馬射既而問

之曰吳之君子亦能斯乎陟曰此軍人騎士肄業所及士大夫君子未有為之者矣布大慙既至魏帝見之使僕問曰來時吳王何如陟對曰來時皇帝臨軒百寮陪位御膳無恙晉文王饗之百寮畢會使僕者告曰某若安樂公也某者匈奴單于也陟曰西王失土為君王所禮位同三代莫不感義匈奴邊塞難羈之國君王懷之親在坐席此誠威恩遠著又問吳之戍備幾何對曰自西陵以至江都五千七百里又問曰道里甚遠難為堅固對曰疆界雖遠而其險要必爭之地不過數四猶人雖有八尺之軀靡不受患其護風寒亦數處耳文王善之厚為之禮臣松之以為人有八尺之體靡不受患防護風寒豈唯數處取譬若此未足稱能若曰譬如金城萬雉所急防者四門而已方陟此對不猶愈乎吳錄曰皓以諸父與和相連及者家屬皆徙東治唯陟以有密旨特封子孚都亭侯孚弟瞻字思遠入仕晉驃騎將軍弘璆曲阿人弘咨之孫權外甥也璆後至中書令太子

少傅紹行到濡須召還殺之徙其家屬建安始有白紹稱

美中國者故也夏四月蔣陵言甘露降於是改元大赦
秋七月皓逼殺景后朱氏亡不在正殿於苑中小屋治
喪衆知其非疾病莫不痛切又送休四子於吳小城尋
復追殺大者二人九月從西陵督步闡表徙都武昌御
史大夫丁固右將軍諸葛靚鎮建業陟璆至洛遇晉文
帝崩十一月乃遣還皓至武昌又大赦以零陵南部為
始安郡桂陽南部為始興郡十二月晉受禪

寶鼎元年正月遣大鴻臚張儼五官中郎將丁忠弔祭

晉文帝及還儼道病死

吳錄曰儼字子節吳人也弱冠知名歷顯位以博聞多識拜大

鴻臚使於晉皓謂儼曰今南北通好以君為有出境之才故相屈行對曰皇皇者華蒙其榮耀無古人延譽之美磨厲鋒鈐思不辱命既至車騎將軍賈充尚書令裴秀侍中荀勗等欲倣以所不知而不能屈尚書僕射羊祜尚書何禎並忠說皓曰北方守戰之具不設弋陽可結縞帶之好

襲而取皓訪羣臣鎮西大將軍陸凱曰夫兵不得已而用之耳且三國鼎立已來更相侵伐無歲寧居今彊敵新并巴蜀有兼土之實而遣使求親欲息兵役不可謂

其求援於我今敵形勢方彊而欲微幸求勝未見其

也車騎將軍劉纂曰天生五才誰能去兵譎詐相雄有

自來矣若其有闕庸可棄乎宜遣間諜以觀其勢皓陰

納纂言且以蜀新平故不行然遂自絕八月所在言得

大鼎於是改年大赦以陸凱為左丞相常侍萬或為右

丞相冬十月永安山賊施但等聚眾數千人

吳錄曰永安今武康

縣也劫皓庶弟永安侯謙出烏程取孫和陵上鼓吹曲蓋

比至建業眾萬餘人丁固諸葛靚逆之於牛屯大戰但

等敗走獲謙謙自殺

漢晉春秋曰初望氣者云荊州有王氣破揚州而建業宮不利故皓

徙武昌遣使者發民掘荊州界大臣名家冢與山岡連者以厭之既聞但反自以為徙土得計也使數百人鼓譟入建業殺但妻子云天子使荊州兵來破揚州賊以厭前氣分會稽為東陽郡分吳

丹陽為吳興郡

皓詔曰古者分土建國所以褒賞賢能廣樹藩屏秦毀五等為三十六郡漢室

初興闢立乃至百王因事制宜蓋無常數也今吳郡陽羨永安餘杭臨水及丹陽故鄣安吉原鄉於潛諸縣地勢水流之便悉注烏程既宜立郡以鎮山越且以藩衛明陵奉承大祭不亦可乎其亟分此九縣為吳興郡治烏程以零陵北部為邵陵郡十二月皓還都建業衛將軍

滕牧留鎮武昌

二年春大赦右丞相萬或上鎮巴丘夏六月起顯明宮

太康三年地記曰吳有太初宮方三百丈權所起也昭明宮方五百丈皓所作也避晉諱故曰顯明吳歷云顯明在太初之東江表傳曰皓營新宮二千石以下皆自入山督攝伐木又破壞諸營大開園囿起土山樓觀窮極伎巧功役之費以億萬計陸凱固諫不從冬十二月皓移居之是歲分豫

章廬陵長沙為安成郡

三年春二月以左右御史大夫丁固孟仁為司徒司空

吳書曰初固為尚書夢松樹生其腹上謂人曰松

秋九

月皓出東關丁奉至合肥是歲遣交州刺史劉俊前部

督修則等入擊交趾為晉將毛晃等所破皆死兵散還合浦

建衡元年春正月立子瑾為太子及淮陽東平王冬十月改年大赦十一月左丞相陸凱卒遣監軍虞汜威南將軍薛翊蒼梧太守陶璜由荊州監軍李勗督軍徐存從建安海道皆就合浦擊交趾

二年春萬彧還建業李勗以建安道不通利殺導將馮斐引軍還三月天火燒萬餘家死者七百人夏四月左

大司馬施績卒殿中列將何定白少府李勗枉殺馮斐
擅徵軍退還勗及徐存家屬皆伏誅秋九月何定將兵
五千人上夏口獵都督孫秀奔晉是歲大赦

三年春正月晦皓舉大衆出華里皓母及妃妾皆行

觀令華覈等固爭乃還

江表傳曰初丹陽刁玄使司馬徽與劉廙論運命歷數事

玄詐增其文以誑國人曰黃旗紫蓋見於東南終有天下者荆揚之君乎又得國中降人言壽春下有童謡曰吳天子當上皓聞之喜曰此天命也即載其母妻子及後宮數千人從牛渚陸道西上云青蓋入洛陽以順天命行遇大雪道塗陷壞兵士被甲持仗百人共引一車寒凍殆死兵人不堪皆曰若遇敵便當倒戈耳皓聞之

乃還
是歲汜瑁破交趾禽殺晉所置守將九真日南皆還

屬

漢晉春秋曰初霍弋遣楊稷毛晃等戍與之誓曰若

賊圍城未百日而降者家屬誅若過百日而城沒者
刺史受其罪稷等日未滿而糧盡乞降於瑁瑁不許而
給糧使守吳人並諫瑁曰霍弋已死無能來者可頌其
糧盡然後乃受使彼來無罪而我取有義內訓吾民
懷鄰國不亦可乎稷晃糧盡故不至乃納之華陽國志
曰稷批為人民建寧人稷等城中食盡死亡者半將軍
王約反降吳人得入城獲稷晃皆囚之孫皓使送稷下
都稷至合浦歐血死晉追贈交州刺史初毛晃與吳軍
戰殺前部督修則陶瑄等以晃壯勇欲赦之而則子允
固求殺晃晃亦不為瑁等屈瑁等怒而縛晃詰之曰晉
兵賊晃厲聲曰吳狗何等為賊吳人生剖其腹允割其
心肝罵曰庸復作賊晃猶罵不止曰尚欲斬汝孫皓汝
父何死狗也乃斬之晉武帝聞而哀矜即詔使晃長子

襲爵餘三子皆關內侯此
與漢晉春秋所說不同

大赦分交趾為新昌郡諸將

破扶嚴置武平郡以武昌督范慎為太尉右大司馬丁

奉司空孟仁卒

吳錄曰仁字恭武江夏人也本名宗避
皓字易馬少從南陽李肅學其母為作

厚褥大被或問其故母曰小兒無德致客學者多貧故
為廣被庶可得與氣類接也其讀書夙夜不懈肅奇之
曰卿宰相器也初為驃騎將軍朱據軍吏將母在營既
不得志又夜雨屋漏因起涕泣以謝其母母曰但當勉
之何足泣也據亦稍知之除為鹽池司馬自能結網手
以捕魚作鮓寄母母因以還之曰汝為魚官而以鮓寄
我非避嫌也遷吳令時皆不得將家之官每得時物來
以寄母常不先食及聞母亡犯禁委官語在權傳特為
減死一等復使為官蓋優之也楚國先賢傳曰宗母嗜
筍冬節將至時筍尚未生宗入竹林哀歎而筍為之出

得以供母皆以為至孝之所
致感累遷光祿勳遂至公矣

西苑言鳳皇集改明年元

鳳皇元年秋八月徵西陵督步闡闡不應據城降晉遣

樂鄉都督陸抗圍取闡闡衆悉降闡及同計數十人皆

夷三族大赦是歲右丞相萬或被譴憂死徙其子弟於

廬陵

江表傳曰初皓游華里或與丁奉留平密謀曰此行不急若至華里不歸社稷事重不得不自還此

語頗泄皓聞知以或等舊臣且以計忍而陰銜之後因會以毒酒飲或傳酒人私減之又飲留平平覺之服他

藥以解得不死或自殺平憂慙月餘亦死

何定奸穢發聞伏誅皓以其惡似

張布追改定名為布

江表傳曰定汝南人本孫權給使也後出補吏定佞邪僭媚自表先

帝舊人求還內侍皓以為樓下都尉典知酷糴事專為威福而皓信任委以衆事定為子求少府李勗女不許定挾忿詣勗於皓皓尺口誅之焚其尸定又使諸將各上好犬皆千里遠求一犬至直數千匹御犬率具纓直錢一萬一犬一兵養以捕兔供厨所獲無幾吳人皆歸罪於定而皓以為忠勤賜爵列侯吳歷曰中書郎奚熙諧宛陵令賀惠惠邵弟也遣使者徐繁訊治熙又諧繁顧護不即決斷皓遣使就宛陵斬繁收惠付獄會赦得免

二年春三月以陸抗為大司馬司徒丁固卒秋九月改封淮陽為魯東平為齊又封陳留章陵等九王凡十一王王給三千兵大赦皓愛妾或使人至市劫奪百姓財

物司市中郎將陳聲素皓幸臣也恃皓寵遇繩之以法
妾以愬皓皓大怒假他事燒鋸斷聲頭投其身於四望
之下是歲太尉范慎卒

三年會稽妖言章安侯奮當為天子臨海太守奚熙與
會稽太守郭誕書非論國政誕但白熙書不白妖言送

付建安作船

會稽邵氏家傳曰邵疇字溫伯時為誕功曹誕被收惶遽無以自明疇進曰疇今自

在疇之事明府何憂遂詣吏自列云不白妖言事由於
已非府君罪吏上疇辭皓怒猶盛疇慮誕卒不免遂自
殺以證之臨亡置辭曰疇生長邊陲不聞殺道得以門
資廁身本郡踰越儕類位極朝右不能贊揚盛化養之

以福今妖訛橫興干國亂紀疇以噂噉之語本非事實
雖家誦人詠不足有慮天下重器而匹夫橫議疾其醜
聲不惡聞見欲含垢藏疾不彰之翰筆鎮躁歸靜使之
自息鬼心勤勤每執斯旨故誕屈其所是默以見從此
之為愆實由於疇謹不敢逃死歸罪有司唯乞天鑒特
垂清察吏收疇喪得辭以聞皓乃免誕大刑送付建安
作船疇亡時年四十皓嘉

疇節義詔郡縣圖形廟堂遣三郡督何植收熙熙發兵

自衛斷絕海道熙部曲殺熙送首建業夷三族秋七月

遣使者二十五人分至州郡科出亡叛大司馬陸抗卒

自改年及是歲連大疫分鬱林為桂林郡天冊元年吳
郡言掘地得銀長一尺廣三分刻上有年月字於是大

赦改年

天璽元年吳郡言臨平湖自漢末草穢壅塞今更開通
長老相傳此湖塞天下亂此湖開天下平又於湖邊得
石函中有小石青白色長四寸廣二寸餘刻上作皇帝
字於是改年大赦會稽太守車浚湘東太守張詠不出
算緡就在所斬之徇首諸郡

江表傳曰浚在公清忠值
郡荒旱民無資糧表求振

貸賂謂浚欲樹私恩遣人梟首又尚書熊睦見賂
酷虐微有所諫賂使人以刀環撞殺之身無完肌秋八

月京下督孫楷降晉鄱陽言歷陽山石文理成字凡二

十云楚九州渚吳九州都揚州士作天子四世治太平

始

江表傳曰歷陽縣有石山臨水高百丈其三十丈所有七穿駢羅穿中色黃赤不與本體相似俗相傳謂

之石印又云石印封發天下當太平下有祠屋巫祝言石印神有三郎時歷陽長表上言石印發皓遣使以太牢祭歷山巫言石印三郎說天下方太平使者作高梯上看印文詐以朱書石作二十字還以啓皓皓大喜曰吳當為九州作都渚乎從大皇帝及孤四世矣太平之主非孤復誰重遣使以印綬拜三郎為王又刻石立銘褒贊靈德

以容休祥

又吳興陽羨山有空石長十餘丈名曰石室

在所表為大瑞乃遣兼司徒董朝兼太常周處至陽羨縣封禪國山明年改元大赦以協石文

天紀元年夏夏口督孫慎出江夏汝南燒略居民初騶
子張俶多所譖白累遷為司直中郎將封侯甚見寵愛
是歲奸情發聞伏誅

江表傳曰俶父會稽山陰縣卒也知俶不良上表云若用俶為司直

有罪乞不從坐皓許之俶表立彈曲二十人專糾司不法於是愛惡相攻互相謗告彈曲承言收繫囹圄聽訟失理獄以賄成人民窮困無所措手足俶奢淫無厭取小妻三十餘人擅殺無辜衆奸並發父子俱見車裂

二年秋七月立成紀宣威等十一王王給三千兵大赦
三年夏郭馬反馬本合浦太守修允部曲督允轉桂林
太守疾病住廣州先遣馬將五百兵至郡安撫諸夷允

死兵當分給馬等累世舊軍不樂離別皓時又科實廣州戶口馬與部曲將何典王族吳述殷興等因此恐動兵民合聚人衆攻殺廣州督虞授馬自號都督交廣二州諸軍事安南將軍興廣州刺史述南海太守典攻蒼梧族攻始興

漢晉春秋曰先是吳有說讖者曰吳之敗兵起南裔亡吳者公孫也皓聞之文武職

位至於卒伍有姓公孫者皆徙於廣州不令停江邊及聞馬反大懼曰此天亡也

八月以軍師

張悌為丞相牛渚都督何植為司徒執金吾滕循為司空未拜轉鎮南將軍假節領廣州牧率萬人從東道討

馬興族遇於始興未得前馬殺南海太守劉略逐廣州
刺史徐旗皓又遣徐陵督陶濬將七千人從西道命交
州牧陶璜部伍所領及合浦鬱林諸郡兵當與東西軍
共擊馬有鬼目菜生工人黃耆家依緣棗樹長丈餘莖
廣四寸厚三分又有薺菜生工人吳平家高四尺厚三
分如枇杷形上廣尺八寸下莖廣五寸兩邊生菜綠色
東觀案圖名鬼目作芝草薺菜作平慮草遂以耆為侍
芝郎平為平慮郎皆銀印青綬冬晉命鎮東大將軍司

馬由向涂中安東將軍王渾揚州刺史周浚向牛渚建
威將軍王戎向武昌平南將軍胡奮向夏口鎮南將軍
杜預向江陵龍驤將軍王濬廣武將軍唐彬浮江東下
太尉賈充為大都督量宜處要盡軍勢之中陶濬至武
昌聞北軍大出停駐不前初皓每宴會羣臣無不咸令
沈醉置黃門郎十人特不與酒侍立終日為司過之吏
宴罷之後各奏其闕失迂視之咎謬言之愆罔有不舉
大者即加威刑小者輒以為罪後宮數千而采擇無已

又激水入宮宮人有不合意者輒殺流之或剝人之面
或鑿人之眼岑昏險諛貴幸致位九列好興功役衆所
患苦是以上下離心莫為皓盡力蓋積惡已極不復堪

命故也

吳平後晉侍中庾峻等問皓侍中李仁曰聞吳主披人面別人足有諸乎仁曰以告者過也君

子惡居下流天下之惡皆歸焉蓋此事也若信有之亦不足能怪昔唐虞五刑三代七辟肉刑之制未為酷虐皓為一國之主秉殺生之柄罪人陷法加之以懲何足多罪夫受免誅者不能無怨受桀賞者不能無慕此人情也又問曰云歸命侯乃惡人橫睛逆視皆鑿其眼有諸乎仁曰亦無此事傳之者謬耳曲禮曰視天子由裕以下視諸侯由頤以下視大夫由衡視士則平面得游目五步之內視上於衡則傲下於帶則憂旁則邪以禮

視瞻高下不可不慎況人君乎哉視人君相迕是乃禮所謂傲慢傲慢則無禮無禮則不臣不臣則犯罪犯罪則陷不測矣正使有之將有何失凡仁所答峻等皆善之文多不悉

四年春立中山代等十一王大赦濬彬所至則土崩瓦

解靡有禦者預又斬江陵督伍延渾復斬丞相張悌丹

陽太守沈瑩等所在戰克

干寶晉紀曰吳丞相軍師張悌護軍孫震丹陽太守沈瑩

帥衆三萬濟江圍成陽都尉張喬於楊荷喬衆才七千閉柵自守舉白接告降吳副軍師諸葛靚欲屠之悌曰強敵在前不宜先事其小且殺降不祥靚曰此等以救兵未至而力少故且偽降以緩我非來伏也因其無戰心而盡阮之可以成三軍之氣若舍之而前必為後患悌不從撫之而進與討吳護軍張翰揚州刺史周浚成

陣相對沈瑩領丹陽銳卒刀楯五千號曰青巾兵前後
 屢陷堅陣於是以馳淮南軍三衝不動退引亂薛勝蔣
 班因其亂而乘之吳軍以次土崩將帥不能止張喬又
 出其後大敗吳軍於版橋獲悌震瑩等襄陽記曰悌字
 巨先襄陽人少有名理孫休時為屯騎校尉魏伐蜀吳
 人問悌曰司馬氏得政以來大難屢作智力雖豐而百
 姓未服也今又竭其資力遠征巴蜀兵勞民疲而不知
 恤敗於不暇何以能濟昔夫差伐齊非不克勝所以危
 亡不憂其本也況彼之爭地乎悌曰不然曹操雖功蓋
 中夏威震四海崇詐杖術征伐無已民畏其威而不懷
 其德也不敵承之係以慘虐內興宮室外懼雄豪東西
 驅馳無歲獲安彼之失民為日久矣司馬懿父子自握
 其柄累有大功除其煩苛而布其平惠為之謀主而救
 其疾民心歸之亦已久矣故淮南三叛而腹心不擾曹
 髦之死四方不動推堅敵如折枯蕩異同如反掌任賢
 使能各盡其心非智勇兼人孰能如之其威武張矣本

根固矣羣情服矣奸計立矣今蜀閭官專朝國無政令而玩戎黷武民勞卒弊競於外利不修守備彼彊弱不同智算亦勝因危而伐殆其克乎若其不克不過無功終無退北之憂覆軍之慮也何為不可哉昔楚劔利而秦昭懼孟明用而晉人憂彼之得志故我之大患也吳人笑其言而蜀果降於魏晉來伐吳皓使梯督沈瑩諸葛昶帥衆三萬渡江逆之至牛渚沈瑩曰晉治水軍於蜀久矣今傾國大舉萬里齊力必悉益州之衆浮江而下我上流諸軍無有戒備名將皆死幼少當任恐邊江諸城盡莫能禦也晉之水軍必至於此矣宜畜衆力待來一戰若勝之日江西自清上方雖壞可還取之今渡江逆戰勝不可保若或推喪則大事去矣梯曰吳之將亡賢愚所知非今日也吾恐蜀兵來至此衆心必駭懼不可復整今宜渡江可用決戰力爭若其敗喪則同死社稷無所復恨若其克勝則北敵奔走兵勢萬倍便當乘威南上逆之中道不憂不破也若如子計恐行散盡

相與坐待敵到君臣俱降無復一人死難者不亦辱乎
遂渡江戰吳軍大敗諸葛靚與五六百人退走使過迎
惓惓不肯去靚自往牽之謂曰且夫天下存亡有大數
豈卿一人所知如何故自取死為惓惓垂涕曰仲思今日
是我死日也且我作兒童時便為卿家丞相所拔常恐
不得其死負名賢知顧今以身徇社稷復何適邪莫牽
曳之如是靚流涕放之去百餘步已見為晉軍所殺吳
錄曰惓惓少知名及處大任希合時趣將護左右清論譏
之搜神記曰臨海松陽人柳榮從惓至揚州榮病死船
中二日時軍已上岸無有埋之者忽然大呼言人縛軍
師人縛軍師聲激揚遂活人問之榮曰上天北斗門下
卒見人縛張惓意中大愕不覺大呼言何以縛張軍師
門下人怒榮叱逐使去榮便去怖懼口餘聲
發揚耳其曰惓戰死榮至晉元帝時猶在

三月丙寅

殿中親近數百人叩頭請誅殺岑昏皓惶憤從之

干寶
晉紀

曰皓殿中親近數百人叩頭謂皓曰北軍日近而兵不舉必陛下將如之何皓曰何故對曰坐岑昏皓獨言若爾當以奴謝百姓衆因曰唯遂並起收昏皓駱驛追止已屠之也

戊辰陶濬從武昌還

即引見問水軍消息對曰蜀船皆小今得二萬兵乘大船戰自足擊之於是合衆授濬節鉞明日當發其夜衆悉逃走而王濬順流將至司馬卬王渾皆臨近境皓用光祿勳薛瑩中書令胡冲等計分遣使奉書於濬卬渾曰昔漢室失統九州分裂先人因時略有江南遂分阻山川與魏乖隔今大晉龍興德覆四海閭閻劣偷安未喻

天命至於今者猥煩六軍衡蓋路次遠臨江渚舉國震
惶假息漏刻敢緣天朝含弘光大謹遣私署太常張夔
等奉所佩印綬委質請命惟垂信納以濟元元

江表傳載皓將

敗與舅何植書曰昔大皇帝以神武之略奮三千之卒
割據江南席卷交廣開拓洪基欲祚之萬世至孤末德
嗣守成緒不能懷集黎元多為咎闕以違天度闇昧之
變反謂之祥致使南蠻逆亂征討未克間晉大衆遠來
臨江庶竭勞瘁衆皆摧退而張悌不反喪軍過半孤甚
愧悵於今無聊得陶濬表云武昌以西並復不守不守
者非糧不足非城不固兵將背戰耳兵之背戰豈怨兵
邪孤之罪也天文縣變於上士民憤歎於下觀此事勢
危如累卵吳祚終訖何其局哉天匪亡吳孤所招也曠
日黃壤當復何顏見四帝乎公其勗勉奇謨飛筆以聞

皓又遺羣臣書曰孤以不德忝繼先軌處位歷年政教
凶悖遂令百姓久困塗炭至使一朝歸命有道社稷傾
覆宗廟無主慙愧山積沒有餘罪自惟空薄過偷尊號
才瑣質穢任重王公故周易有折鼎之誠詩人有彼其
之譏自居宮室仍抱篤疾計有不足思慮失中多所荒
替邊側小人因生酷虐虐毒橫流忠順被害闇昧不覺
尋其壅蔽孤負諸君事已難圖覆水不可收也今大晉
平治四海勞心務於擢賢誠是英俊展節之秋也管仲
極讐桓公用之良平去楚入為漢臣舍亂就理非不忠
也莫以移朝改朔用損厥志嘉勗休尚愛敬動靜夫復
何言投

壬申王濬最先到於是受皓之降解縛焚櫬延

請相見

晉陽秋曰濬收其圖籍領州四郡四十二縣三
百一十三戶五十二萬三千吏三萬二千兵二

十三萬男女口二百三十萬米穀二百八十萬斛
舟船五千餘艘後宮五千餘人

由以皓致印

綬於已遣使送皓皓舉家西遷以太康元年五月丁亥
集於京邑四月甲申詔曰孫皓窮迫歸降前詔待之以
不死今皓垂至意猶愍之其賜號為歸命侯進給衣服
車乘田三十頃歲給穀五千斛錢五十萬絹五百匹綿
五百斤皓太子瑾拜中郎諸子為王者拜郎中

搜神記
曰吳以

草創之國信不堅固邊屯守將皆質其妻子名曰保質
童子少年以類相與嬉遊者日有十數永安二年三月
有一異兒長四尺餘年可六七歲衣青衣來從羣兒戲
諸兒莫之識也皆問曰爾誰家小兒今日忽來答曰見
爾羣戲樂故來耳詳而視之眼有光芒燭燭外射諸兒
畏之重問其故兒乃答曰爾惡我乎我非人也乃熒惑

星也將有以告爾三公鉏司馬如諸兒大驚或走告大人大人馳往觀之兒曰舍爾去乎竦身而躍即以化矣仰而視之若引一匹練以登天大人來者猶及見焉飄飄漸高有頃而沒時吳政峻急莫敢宣也後五年而蜀亡六年而晉興至是而吳滅司馬如矣干寶晉紀曰王叡治船於蜀吾考取其流柿以呈孫皓曰晉必有攻吳之計宜增建平兵建平不下終不敢渡江皓弗從陸抗之克步闡皓意張大乃使尚廣筮并天下遇同人之頤對曰吉庚子歲青蓋當入洛陽故皓不修其政而恒有窺上國之志是歲也實在庚子

五年皓死於洛陽

吳錄曰皓以四年十二月死時年四十二葬河南縣界

評曰孫亮童孺而無賢輔其替位不終必然之勢也休以舊愛宿恩任用興布不能拔進良才改絃易張雖志

善好學何益救亂乎又使既廢之亮不得其死友于之
義薄矣皓之淫刑所濫隕斃流黜者蓋不可勝數是以
羣下人人惴恐皆日日以冀朝不謀夕其熒惑巫祝交
致祥瑞以為至急昔舜禹躬稼至聖之德猶或矢誓衆
臣子違女弼或拜昌言常若不及况皓凶頑肆行殘暴
忠諫者誅讒諛者進虐用其民窮淫極侈宜腰首分離
以謝百姓既蒙不死之詔復加歸命之寵豈非曠蕩之
恩過厚之澤也哉

孫盛曰夫古之立君所以司牧羣黎
故必仰協乾坤覆燠萬物若乃淫虐

是縱酷彼羣生則天人殛之勦絕其祚奪其南面之尊
加其獨夫之戮是故湯武抗鉞不犯不順之譏漢高奮
劍而無失節之議何者誠四海之酷讐而人神之所殯
故也況皓罪為逋寇虐過辛癸梟首素旗猶不足以謝
冤魂洿室薦社未足以紀暴迹而乃優以顯命寵錫仍
加豈龔行天罰伐罪弔民之義乎是以知僭逆之不懲
而凶酷之莫戒詩云取彼諧人投畀豺虎聊諧猶然矧
僭虐乎且神旗電掃兵臨偽窟理窮勢迫然後請命不
赦之罪既彰三驅之義又塞極之權道亦無取焉陸機
著辨亡論言吳之所以亡其上篇曰昔漢氏失御奸臣
竊命禍基京畿毒徧宇內皇綱弛紊王室遂卑於是羣
雄蜂駭義兵四合吳武烈皇帝慷慨下國電發荆南權
略紛紜忠勇伯世威被則夷羿震蕩兵交則醜虜授馘
遂掃清宗祊蒸禋皇祖於時雲興之將帶州颶起之師
跨邑哮囁之羣風驅熊羆之族霧集雖兵以義合同盟
戮力然皆包藏禍心阻兵怙亂或師無謀律喪威稔寇

忠規武節未有若此其著者也武烈既沒長沙桓王逸才命世弱冠秀發招摯遺老與之述業神兵東驅奮寡犯衆攻無堅城之將戰無交鋒之虜誅叛柔服而江外底定飾法修師而威德翕赫賓禮名賢而張昭為之雄交御豪俊而周瑜為之傑彼二君子皆弘敏而多奇雅達而聰哲故同方者以類附等契者以氣集而江東益多士矣將北伐諸華誅鉏干紀旋皇輿於夷庚反帝座於紫闥挾天子以令諸侯清天步而歸舊物戎車既次羣凶側目大業未就中世而隕用集我大皇帝以奇蹤襲於逸軌敵心發乎令圖從政咨於故實播憲稽乎遺風而加以篤固申之以節儉疇咨俊茂好謀善斷東帛旅於丘園旌命交於塗巷故豪彥尋聲而響臻志士希光而影驚異人輻輳猛士如林於是張昭為師傅周瑜陸公魯肅呂蒙之疇入為腹心出作股肱甘寧凌統程普賀齊朱桓朱然之徒奮其威韓當潘璋黃蓋蔣欽周泰之屬宣其力風推則諸葛瑾張承步騭以聲名光

國政事則顧雍潘濬呂範呂岱以器任幹職奇偉則虞翻陸績張溫張惇以諷議舉正奉使則趙咨沈珩以敏達延譽術數則吳範趙達以機祥協德董襲陳武殺身以衛主駱統劉基彊諫以補過謀無遺算舉不失策故遂割據山川跨制荆吳而與天下爭衡矣魏氏常藉戰勝之威率百萬之師浮鄧塞之舟下漢陰之衆羽揖萬計龍躍順流銳騎千旅虎步原隰謀臣盈室武將連衡喟然有吞江潁之志一宇宙之氣而周瑜驅我偏師黜之赤壁喪旗亂轍僅而獲免收迹遠遁漢王亦馮帝王之號率巴漢之民乘危騁變結壘千里志報關羽之敗圖收湘西之地而我陸公亦挫之西陵覆師敗績因而後濟絕命永安續以濡須之寇臨川摧銳蓬籠之戰子輪不反由是二邦之將喪氣摧鋒勢衄財匱而吳貌然坐乘其弊故魏人請好漢氏乞盟遂躋天號鼎峙而立西屠庸蜀之郊北裂淮漢之溪東苞百越之地南括羣蠻之表於是講八代之禮蒐三王之樂告類上帝拱揖

羣后虎臣毅卒循江而守長戟勁鍛望颺而奮庶尹盡
規於上四民展業於下化協殊裔風行遐圻乃俾一介
行人撫巡外域巨象逸駿擾於外閑明珠瑋寶輝於內
府珍瑰重跡而至奇玩應響而赴輻軒騁於南荒衝轡
息於朔野齊民免干戈之患戎馬無晨服之虞而帝業
固矣大皇既歿幼主莅朝奸回肆虐景皇聿興虔修遺
憲政無大闕守文之良主也降及歸命之初典刑未滅
故老猶存大司馬陸公以文武熙朝左丞相陸凱以睿
諤盡規而施績范慎以威重顯丁奉鍾離斐以武毅稱
孟宗丁固之徒為公卿樓玄賀邵之屬掌機事元首雖
病股肱猶良爰及末葉羣公既喪然後黔首有瓦解之
志皇家有土崩之釁歷命應化而徵王師躡運而發卒
散于陣民奔於邑城池無藩籬之固山川無溝阜之勢
非有工輸雲梯之械智伯灌激之害楚子築室之圍燕
人濟西之隊軍未浹辰而社稷夷矣雖忠臣孤憤烈士
死節將奚救哉夫曹劉之將非一世之選向時之師無

曩日之衆戰守之道抑有前符險阻之利俄然未改而
成敗貿理古今詭趣何哉彼此之化殊受任之才異也
其下篇曰昔三方之王也魏人據中夏漢氏有岷益吳
制荆揚而有交廣曹氏雖功濟諸華虐亦深矣其民怨
矣劉公因險飾知功已薄矣其俗陋矣吳桓王基之以
武太祖成之以德聰明睿達懿度深遠矣其求賢如不
及恤民如稚子接士盡盛德之容親仁罄丹府之愛拔
呂蒙於戎行識潘璋於係虜推誠信士不恤人之我敗
量能受器不患權之我逼執鞭勒躬以重陸公之威悉
委武衛以濟周瑜之師卑宮菲食以豐功臣之賞披懷
虛己以納謨士之算故魯肅一面而自託士雙蒙險而
效命高張公之德而省游田之娛賢諸葛之言而割情
欲之歡感陸公之規而除刑政之煩奇劉基之議而作
三爵之誓屏氣跼踖以伺子明之疾分滋損甘以育凌
統之孤登壇慷慨歸魯肅之功削授惡言信子瑜之節
是以忠臣競盡其謀志士咸得肆力洪規遠略固不厭

夫區區者也故百官苟合庶務未遑初都建業羣臣請備禮秩天子辭而不許曰天下其謂朕何宮室與服蓋慊如也爰及中葉天人之分既定百度之缺粗修雖醲化懿網未齒乎上代抑其體國經民之具亦足以爲政矣地方幾萬里帶甲將百萬其野沃其民練其財豐其器利東負滄海西阻險塞長江制其區宇峻山帶其封域國家之利未見有弘於茲者矣借使中才守之以道善人御之有術敦率遺憲勤民謹政循定策守常險則可以長世永年未有危亡之患或曰吳蜀脣齒之國蜀滅則吳亡理則然矣夫蜀蓋藩援之與國而非吳人之存亡也何則其郊境之接重山積險陸無長轂之徑川阮流迅水有驚波之艱雖有銳師百萬啓行不過千夫舳艫千里前驅不過百艦故劉氏之伐陸公喻之長蛇其勢然也昔蜀之初亡朝臣異謀或欲積石以險其流或欲機械以御其變天子總羣議而諮之大司馬陸公陸公以四瀆天地之所以節宣其氣固無可遏之理而

機械則彼我之所共彼若棄長技以就所屈卽荆揚而爭舟楫之用是天贊我也將謹守峽口以待禽耳建步關之亂憑保城以延彊寇重資幣以誘羣蠻於是大邦之衆雲翻電發縣旌江介築壘遵渚襟帶要害以止吳人之西而巴漢舟師沿江東下陸公以偏師三萬北據東坑深溝高壘寨甲養威反虜踰跡待殲而不敢北關生路彊寇敗績宵遁喪師大半分命銳師三千西禦水軍東西同捷獻俘萬計信哉賢人之謀豈欺我哉自是烽燧罕警封域寡虞陸公沒而潛謀兆吳釁深而六師駭夫太康之役衆未盛乎曩日之師廣州之亂禍有愈乎向時之難而邦家顛覆宗廟為墟嗚呼人之云亡邦國殄悴不其然與易曰湯武革命順乎天或曰亂不極則治不形言帝王之因天時也古人有言曰天時不如地利易曰王侯設險以守其國言為國之恃險也又曰地利不如人和在德不在險言守險之由人也吳之興也參而由馬孫卿所謂合其參者也及其亡也恃險而

已入孫卿所謂舍其參者也夫四川之氓非無衆也大
江之南非乏俊也山川之險易守也勁利之器易用也
先政之業易循也功不興而禍遽者何哉所以用之者
失也故先王建經國之長規審存亡之至數恭己以安
百姓敦惠以致人和寬冲以誘俊乂之謀慈和以結士
民之愛是以其安也則黎元與之同慶及其危也則兆
庶與之共患安與衆同慶則其危不可得也危與下同
患則其難不足卹也夫然故能保其社稷而固其土宇
參秀無悲殷之思黍離無愍周之感矣

吳志卷三

吳志卷三考證

孫亮心自不安○太平御覽作心不自安

勸為亮納○太平御覽作勸權為亮納為妃

閏月以恪為帝太傅○

臣龍官

按以孫休永安元年與

皓元興元年例之閏月上應有建興元年四字未有
嗣君改元而不書其紀年之理

召還據等聞緄代峻大怒○

臣浩

按文義似應作召還

據等據等聞緄代峻大怒應重書據等二字

日於苑中習焉注緣遇燥矢故成亮之慧○慧監本作
惠今從毛本作慧然晉宋以下史慧惠多通用

詔州郡伐宮材○宮材毛本作官材

孫休有老公于休叩頭曰○于休宋本作干休

以會稽南郡為建安郡○南郡宜作南部

大赦注政以治民是以政成而民則○治民宋本作正
民民則宋本作民聽

又注然欲令難犯何患無名○宋本然作休

癸未休薨注休寢疾口不能言○監本訛作日不能言
今改正

孫皓宣明至懷注孫休時父亮為尚書令○孫休時太
平御覽作景皇時

又注西王失土為君王所禮○西王冊府作西主
儼道病死注蒙其榮耀無古人延譽之美○太平御覽
作蒙其榮懼無古人延譽之美

九真日南皆還屬注璜等怒面縛吳詰之曰晉兵賊○

兵字疑衍

送付建安作船注吏收疇喪○監本訛作更收疇喪今
改正

太平始注所有七穿駢羅穿中色黃赤○七穿宋本作
土穿

又注皓大喜曰吳當為九州作都渚乎○宋本無為
字

是歲奸情發聞伏誅注倣表立彈曲二十人專糾司不

法○表立監本訛作表正今改正

又注彈曲承言收繫囹圄○收繫監本訛作收累今改正

又注取小妻三十餘人○宋本三十作二十

所在戰克注悌不肯去覲自往牽之謂曰且夫天下存亡有大數豈卿一人所知○臣明楷按且夫二字疑

衍或為巨先之譌巨先張悌字也下文悌曰仲思今日是我死日也明為彼此相字

皓惶憤從之注皓殿中親近數百人叩頭謂皓曰○謂皓宋本作請皓

延請相見注郡四十二○太平御覽作郡三十三

諸子為王者拜郎中○太平御覽作皆拜郎中

五年皓死於洛陽○臣清植按蜀志於安樂公書曰公

太始七年薨於洛陽而皓則書名書死亦見史法

昔舜禹躬稼至聖之德○稼字疑衍

過厚之澤也哉注則天人殛之○宋本無人字

又注遂掃清宗祊蒸禋皇祖○宗祊監本誤宗枋今改正

又注丁奉鍾離斐以武毅稱○何焯曰文選無鍾字注云魏將諸葛誕據壽春降魏人圍之使奉與黎斐解圍奉為先登黎斐力戰拜左將軍黎與離音相近是一人但字不同臣浩按李善所見之本必可徵信但此斐字恐牧字之譌鍾離牧為武陵太守以少衆討平五谿事在蜀并于魏之後作牧為得也

又注分命銳師三千。宋本作五千。

吳志卷三考證

謹案第八頁前六行其宅上枯樹猶在據毛本上
作址

第二十頁前六行三年刊本三訛二據毛本改

第二十六頁前五行亡吳者公孫也刊本亡訛世

據毛本改

第二十九頁後七行怖懼口餘聲發揚耳刊本口

訛日據搜神記改

第三十五頁前三行劉公刊本誤作翁据明監本

改



覆校官助教 臣 金學詩

校對官修撰 臣 張書勲

謄錄監生 臣 朱溥

欽定四庫全書薈要

史部

吳志卷六

四至



吳志卷四

晉著作郎巴西中正安漢陳壽撰

宋太中大夫國子博士間喜裴松之注

劉繇

子基

太史慈

士燮

子徽

燮弟壹

壹子匡

劉繇字正禮東萊牟平人也齊孝王少子封牟平侯子

孫家焉繇伯父寵為漢太尉

續漢書曰繇祖父本師受經傳博學羣書號為通儒

舉賢良方正為般長卒官寵字祖榮受父業以經明行脩舉孝廉光祿大夫察四行除東平陵令視事數年以

母病棄官百姓士民攀輿拒輪充塞道路車不得前乃止亭輕服潛遁歸脩供養後辟大將軍府稍遷會稽太守正身率下郡中大治徵入為將作大匠山陰縣民去治數十里有若邪中在山谷間五六老翁年皆七八十閒寵遷相率共送寵人齋百錢寵見勞來曰父老何乃自苦遠來皆對曰山谷鄙老生未嘗至郡縣他時吏發求不去民間或夜不絕狗吠竟夕民不得安自明府下車以來狗不夜吠吏稀至民間年老遭值聖化今閒當見棄去故勦力來送寵謝之為選受一大錢故會稽號寵為取一錢太守其清如是寵前後歷二郡八居九列四登三事家不藏賄無重寶器恒菲飲食薄衣服弊車羸馬號為窶陋三去相位輒歸本土往來京師常下道脫驂過人莫知焉寵嘗欲止亭亭更止之曰整頓傳舍以待劉公不可得止寵因過去其廉儉皆此類也以老病卒

繇兄岱字公山歷位侍中兗州刺史

續漢書曰繇父輿一名方

山陽太守岱繇皆有雋才英雄
記稱岱孝悌仁恕以虛己受人
繇年十九從父韙為賊

所劫質繇篡取以歸由是顯名舉孝廉為郎中除下邑
長時郡守以貴戚託之遂棄官去州辟部濟南濟南相
中常侍子貪穢不循繇奏免之平原陶丘洪薦繇欲令
舉茂才刺史曰前年舉公山奈何復舉正禮乎洪曰若
明使君用公山於前擢正禮於後所謂御二龍於長途
騁騏驥於千里不亦可乎會辟司空掾除侍御史不就
避亂淮浦詔書以為揚州刺史時袁術在淮南繇畏憚

不敢之州欲南渡江吳景孫賁迎置曲阿術圖為僭逆
攻沒諸郡縣繇遣樊能張英屯江邊以拒之以景賁術
所授用乃迫逐使去於是術乃自置揚州刺史與景賁
并力攻英能等歲餘不下漢命加繇為牧振武將軍衆
萬餘人孫策東渡破英能等繇奔丹徒

袁宏漢紀曰劉繇將奔會稽許

子將曰會稽富實策之所貪且窮在海隅不可往也不
如豫章北連豫壤西接荊州若收合吏民遣使貢獻與
曹兖州相聞雖有袁公路隔在其間其人豺狼不
能久也足下受王命孟德景升必相救濟繇從之遂泝

江南保豫章駐彭澤笮融先至殺太守朱皓

笮音壯力
反獻帝春

秋曰是歲繇屯彭澤又使融助皓討劉表所用太守諸葛玄許子將謂繇曰竿融出軍不顧命名義者也朱文明善推誠以信人宜使密防之融到果詐殺皓代領郡事入居郡中繇進討融為融所破更復招合屬縣攻破融融走入山為民所殺繇尋病卒時年四十二竿融者丹陽人初聚眾數百往依徐州牧陶謙謙使督廣陵彭城運漕遂放縱擅殺坐斷三郡委輸以自入乃大起浮圖祠以銅為人黃金塗身衣以錦采垂銅槃九重下為重樓閣道可容三千餘人悉課讀佛經令界內及旁郡人有好佛者聽受道復其

他役以招致之由此遠近前後至者五千餘人戶每浴
佛多設酒飯布席於路經數十里民人來觀及就食且
萬人費以巨億計曹公攻陶謙徐土搔動融將男女萬
口馬三千匹走廣陵廣陵太守趙昱待以賓禮先是彭
城相薛禮為陶謙所逼屯秣陵融利廣陵之衆因酒酣
殺昱放兵大略因載而去過殺禮然後殺皓後策西伐
江夏還過豫章收載繇喪善遇其家王朗遺策書曰劉
正禮昔初臨州未能自達實賴尊門為之先後用能濟

江成治有所處定踐境之禮感分結意情在終始後以
袁氏之嫌稍更乖刺更以同盟還為讐敵原其本心實
非所樂康寧之後常念渝平更成復踐宿好一爾分離
歟意不昭奄然殂隕可為傷恨知敦以厲薄德以報怨
收骨育孤哀亡愍存捐既往之猜保六尺之託誠深恩
重分美名厚實也昔魯人雖有齊怨不廢喪紀春秋善
之謂之得禮誠良史之所宜藉鄉校之所歎聞正禮元
子致有志操想必有以殊異威盛刑行施之以恩不亦

優哉繇長子基字敬輿年十四居繇喪盡禮故吏餽餉

皆無所受

吳書曰基遭多難嬰丁困苦潛處味道不以為戚與羣弟居常夜臥早起妻妾希見其面

諸弟敬憚事之猶父不妄交游門無雜賓

姿容美好孫權愛敬之權為驃騎

將軍辟東曹掾拜輔義校尉建忠中郎將權為吳王遷

基大農權嘗宴飲騎都尉虞翻醉酒犯忤權欲殺之威

怒甚盛由基諫爭翻以得免權大暑時嘗於船中宴飲

於船樓上值雷雨權以蓋自覆又命覆基餘人不得也

其見待如此徙郎中令權稱尊號改為光祿勳分平尚

書事年四十九卒後權為子霸納基女賜第一區四時寵賜與全張比基二弟鑠尚皆騎都尉

太史慈字子義東萊黃人也少好學仕郡奏曹史會郡與州有隙曲直未分以先聞者為善時州章已去郡守恐後之求可使者慈年二十一以選行晨夜取道到洛陽詣公車門見州吏始欲求通慈問曰君欲通章邪吏曰然問章安在曰車上慈曰章題署得無誤邪取來視之吏殊不知其東萊人也因為取章慈已先懷刀便截

敗之吏踴躍大呼言人壞我章慈將至車間與語曰向使君不以章相與吾亦無因得敗之是為吉凶禍福等耳吾不獨受此罪豈若默然俱出去可以存易亡無事俱就刑辟吏言君為郡敗吾章已得如意欲復亡為慈答曰初受郡遣但來視章通與未耳吾用意太過乃相敗章今還亦恐以此見譴怒故俱欲去爾吏然慈言即日俱去慈既與出城因遁還通郡章州家聞之更遣吏通章有司以格章之故不復見理州受其短由是知名

而為州家所疾恐受其禍乃避之遼東北海相孔融聞而奇之數遣人訊問其母并致餉遺時融以黃巾寇暴出屯都昌為賊管亥所圍慈從遼東還母謂慈曰汝與孔北海未嘗相見至汝行後瞻恤殷勤過於故舊今為賊所圍汝宜赴之慈留三日單步徑至都昌時圍尚未密夜伺閒隙得入見融因求兵出斫賊融不聽欲待外救外救未有至者而圍日偪融欲告急平原相劉備城中人無由得出慈自請求行融曰今賊圍甚密衆人皆

言不可卿意雖壯無乃實難乎慈對曰昔府君傾意於老母老母感遇遣慈赴府君之急固以慈有可取而來必有益也今衆人言不可慈亦言不可豈府君愛顧之義老母遣慈之意邪事已急矣願府君無疑融乃然之於是嚴行蓐食須明便帶鞬攝弓上馬將兩騎自隨各作一的持之開門直出外圍下左右人並驚駭兵馬互出慈引馬至城下塹內植所持的各一出射之射之畢徑入門明晨復如此圍下人或起或臥慈復植的射之

畢復入門明晨復出如此無復起者於是下鞭馬直突
圍中馳去比賊覺知慈行已過又射殺數人皆應弦而
倒故無敢追者遂到平原說備曰慈東萊之鄙人也與
孔北海親非骨肉比非鄉黨特以名志相好有分災共
患之義今管亥暴亂北海被圍孤窮無援危在旦夕以
君有仁義之名能救人之急故北海區區延頸恃仰使
慈冒白刃突重圍從萬死之中自託於君惟君所以存
之備斂容答曰孔北海知世間有劉備邪即遣精兵三

千人隨慈賊聞兵至解圍散走融既得濟益奇貴慈曰
卿吾之少友也事畢還啟其母母曰我喜汝有以報孔
北海也揚州刺史劉繇與慈同郡慈自遼東還未與相
見暫渡江到曲阿見繇未去會孫策至或勸繇可以慈
為大將軍繇曰我若用子義許子將不當笑我邪但使
慈偵視輕重時獨與二騎卒遇策策從騎十三皆韓當
宋謙黃蓋輩也慈便前闔正與策對策刺慈馬而擘得
慈項上手戟慈亦得策兜鍪會兩家兵騎並各來赴於

是解散慈當與繇俱奔豫章而遁於蕪湖亡入山中稱
丹陽太守是時策已平定宣城以東惟涇以西六縣未
服慈因進住涇縣立屯府大為山越所附策躬自攻討
遂見囚執策即解縛捉其手曰寧識神亭時邪若卿爾
時得我云何慈曰未可量也策大笑曰今日之事當與

卿共之

吳歷云慈於神亭戰敗為策所執策素聞其名即解縛請見咨問進取之術慈答曰破軍之將

不足與論事策曰昔韓信定計於廣武今策決疑於仁者君何辭焉慈曰州軍新破士卒離心若儻分散難復合聚欲出宣恩安集恐不合尊意策長跪答曰誠本心所望也明日中望君來還諸軍皆疑策曰太史子義青

州名士以信義為先終不欺策明日大請諸將豫設酒食立竿視影日中而慈至策大悅常與參論諸軍事臣松之按吳歷云慈於神亭戰敗為策所得與本傳大異疑為謬誤江表傳曰策謂慈曰聞卿昔為太守劫州章赴文舉請詣玄德皆有烈義天下智士也但所託未得其人射鈎斬祛古人不嫌孤是卿知己勿憂不如意也出教曰龍欲騰翥先階尺水者也

即置門下督還吳授兵拜折衝中郎

將後劉繇亡於豫章士眾萬餘人未有所附策命慈往

撫安焉

江表傳曰策謂慈曰劉牧往責吾為袁氏攻廬江其意頗猥理怨不足何者先君手下兵數千

餘人盡在公路許孤志在立事不得不屈意於公路求索故兵再往纔得千餘人耳仍令孤攻廬江爾時事勢不得不為行但其後不達臣節自棄作邪僭事諫之不得從丈夫義交苟有大故不得不離孤交求公路及絕之

本末如此今劉繇喪亡恨不及其生時與共論辯今兒子在豫章不知華子魚待遇何如其故部曲復依隨之否卿則州人昔又從事寧能往視其兒子並宣孤意於其部曲部曲樂來者便與俱來不樂來者且安慰之并觀察子魚所以牧禦方規何似視廬陵鄱陽人民親附之否卿手下兵宜將多少自由意慈對曰慈有不赦之罪將軍量同桓文待遇過望古人報主以死期於盡節沒而後已今並息兵兵不宜多將數十人自足以往還也左右皆曰慈必北去不還策曰子義捨我當復與誰

餞送昌門把腕別曰何時能還答曰不過六十日果如

期而反

江表傳曰策初遣慈也議者紛紜謂慈未可信或云與華子魚州里恐留彼為籌策或疑慈西

託黃祖假路還北多言遣之非計策曰諸君語皆非也孤斷之詳矣太史子義雖氣勇有膽烈然非縱橫之人

其心有士謨志經道義貴重然諾一以意許知已死亡不相負諸君勿復憂也慈從豫章還議者乃始服慈見策曰華子魚良德也然非籌略才無他方規自守而已又丹陽僮芝自擅廬陵詐言被詔書為太守鄱陽民帥別立宗部阻兵守界不受子魚所遣長吏言我以別立郡須漢遣真太守來當迎之耳子魚不但不能諧廬陵鄱陽近自海昏有上繚壁有五六千家相結聚作宗伍惟輸租布於郡耳發召一人遂不可得子魚亦覩視之而已策拊掌大笑仍有兼劉表從子磐驍勇數為寇於并之志矣頃之遂定豫章

艾西安諸縣策於是分海昏建昌左右六縣以慈為建昌都尉治海昏并督諸將拒磐磐絕跡不復為寇慈長七尺七寸美鬚髯援臂善射弦不虛發嘗從策討麻保

賊賊於屯裏緣樓上行詈以手持樓焚慈引弓射之矢貫手著焚圍外萬人莫不稱善其妙如此曹公聞其名遺慈書以篋封之發省無所道而但貯當歸孫權統事以慈能制磐遂委南方之事年四十一建安十一年卒

吳書曰慈臨亡歎息曰丈夫生世當帶七尺之劍以升天子之階今所志未從奈何而死乎權甚悼惜之子

亨官至越騎校尉

吳書曰亨字元復歷尚書吳郡太守

士燮字威彥蒼梧廣信人也其先本魯國汶陽人至王莽之亂避地交州六世至燮父賜桓帝時為日南太守

變少游學京師事潁川劉子奇治左氏春秋察孝廉補
尚書郎公事免官父賜喪闋後舉茂材除巫令遷交趾
太守弟壹初為郡督郵刺史丁宮徵還京都壹侍送勤
恪宮感之臨別謂曰刺史若待罪三事當相辟也後宮
為司徒辟壹比至宮已免黃琬代為司徒甚禮遇壹董
卓作亂壹亡歸鄉里

吳書曰琬與卓相害而壹盡心於琬甚有聲稱卓惡之乃署教曰司

徒掾士壹不得除用故歷年不遷會卓入闕壹乃亡歸

交州刺史朱符為夷賊所

殺州郡擾亂變乃表壹領合浦太守次弟徐聞令薊領

九真太守

黠音于鄙反見字林

黠弟武領海南太守變體器寬厚

謙虛下士中國士人往依避難者以百數耽玩春秋為之注解陳國素徽與尚書令荀彧書曰交趾士府君既學問優博又達於從政處大亂之中保全一郡二十餘年疆場無事民不失業羈旅之徒皆蒙其慶雖竇融保河西蜀以加之官事小閑輒玩習書傳春秋左氏傳尤簡練精微吾數以咨問傳中諸疑皆有師說意思甚密又尚書兼通古今大義詳備聞京師古今之學是非忿

爭今欲條左氏尚書長義上之其見稱如此變兄弟並
為列郡雄長一州偏在萬里威尊無上出入鳴鐘磬備
具威儀笳蕭鼓吹車騎滿道胡人夾轂焚燒香者常有
數十妻妾乘輜輶子弟從兵騎當時貴重震服百蠻尉
他不足踰也葛洪神仙傳曰變嘗病死已三日仙人董奉以一九藥與服以水含之捧其頤搖稍
之食頃即開目動手顏色漸復半日能起坐
四日復能語遂復常奉字君異侯官人也

武先病沒

朱符死後漢遣張津為交州刺史津後又為其將區景
所殺而荊州牧劉表遣零陵賴恭代津是時蒼梧太守

史璜死表又遣吳巨代之與恭俱至漢聞張津死賜變
璽書曰交州絕域南帶江海上恩不宣下義壅隔知逆
賊劉表又遣賴恭闚看南土今以變為綏南中郎將董
督七郡領交阯太守如故後變遣吏張旻奉貢詣京都
是時天下喪亂道路斷絕而變不廢貢職特復下詔拜
安遠將軍封龍度亭侯後巨與恭相失舉兵逐恭恭走
還零陵建安十五年孫權遣步騭為交州刺史騭到變
率兄弟奉承節度而吳巨懷異心騭斬之權加變為左

將軍建安末年變遣子廡入質權以為武昌太守變壹諸子在南者皆拜中郎將變又誘導益州豪姓雍闓等率郡人民使遙東附權益嘉之遷衛將軍封龍編侯弟壹偏將軍都鄉侯變每遣使詣權致雜香細葛輒以千數明珠大貝流離翡翠瑇瑁犀象之珍奇物異果蕉邪龍眼之屬無歲不至壹時貢馬凡數百匹權輒為書厚加寵賜以答慰之變在郡四十餘歲黃武五年年九十卒權以交趾縣遠乃分合浦以北為廣州呂岱為刺史

交趾以南為交州戴良為刺史又遣陳時代變為交趾
太守岱留南海良與時俱前行到合浦而變子徽自署
交趾太守發宗兵拒良良留合浦交趾桓鄰變舉吏也
叩頭諫徽使迎良徽怒笞殺鄰鄰兄治子發又合宗兵
擊徽徽閉門城守治等攻之數月不能下乃約和親各
罷兵還而呂岱被詔誅徽自廣州將兵晝夜馳入過合
浦與良俱前壹子中郎將匡與岱有舊岱署匡師友從
事先移書交趾告喻禍福又遣匡見徽說令服罪雖失

郡守保無他憂岱尋匡後至徽兄祗弟幹頌等六人肉袒奉迎岱謝令復服前至郡下明旦早施帳幔請徽兄弟以次入賓客滿坐岱起擁節讀詔書數徽罪過左右因反縛以出即皆伏誅傳首詣武昌

孫盛曰夫柔遠能通莫善於信保大

定功莫善於義故齊桓創基德彰於柯會晉文始伯義顯於伐原故能九合一匡世主夏盟令間長世貽範百王呂岱師友士匡使通信誓徽兄弟肉袒推心委命岱因滅之以要功利君子是以知孫權之不能遠畧而呂氏之祚不延者也

壹黼匡後出權原其罪及變質子廡皆免為

庶人數歲壹黼坐法誅廡病卒無子妻寡居詔在所月

給俸米賜錢四十萬

評曰劉繇藻厲名行好尚臧否至於擾攘之時據萬里之土非其長也太史慈信義篤烈有古人之分士變作守南越優游終世至子不慎自貽凶咎蓋庸才玩富貴而恃阻險使之然也

吳志卷四

吳志卷四考證

劉繇繇伯父寵為漢太尉注山陰縣民去治數十里○

民各本俱訛作氏今改正

又注八居九列四登三事○毛本作入居九列

中常侍子貪穢不循○循冊府作脩

漢命加繇為牧振武將軍衆萬餘人○宋本作衆數萬人

殺太守朱皓注竿融出軍不顧命名義者也○冊府無

命字

因酒酣殺昱○監本誤阻誅殺昱今改正

後策西伐江夏○監本誤路住江夏今改正

太史慈州家聞之更遣使通章○通章監本誤有章今

改正

策命慈往撫安焉注但其後不達臣節○不達宋本作
不遵

子亨官至越騎校尉○監本亨作享今改正

士變壹亡歸鄉里注會卓入闕壹乃亡歸○闕疑作闕
黠弟武領海南太守○海南宋本作南海

尉他不足踰也注捧其頤搖稍之○臣龍官按搖稍二

字不可解稍疑當作捐廣韻搖捐動也蓋謂捧其頤
搖動之也

變又誘導益州豪姓雍閭等率郡人民使遙東附○遙
監本訛作搖今改正

蓋庸才玩富貴而恃阻險○毛本無阻字

吳志卷四考證

吳志卷五

晉著作郎巴西中正安漢陳壽撰

宋太中大夫國子博士間喜裴松之注

孫破虜吳夫人

夫人弟景

吳主權謝夫人

權徐夫人

祖父真
真子琨

權步夫人

權王夫人

權王夫人

權潘夫人

孫亮全夫人

孫休朱夫人

孫和何姬

孫皓滕夫人

孫破虜吳夫人吳主權母也本吳人徙錢唐早失父母

與弟景居孫堅聞其才貌欲娶之吳氏親戚嫌堅輕狡

將拒焉堅甚以慙恨夫人謂親戚曰何愛一女以取禍

乎如有不遇命也於是遂許為婚生四男一女

搜神記曰初夫

人孕而夢月入其懷既而生策及權在孕又夢日入其懷以告堅曰昔妊策夢月入我懷今也又夢日入我懷何也堅曰日月者陰陽之精

極貴之象吾子孫其興乎

景常隨堅征伐有功拜騎

都尉袁術上景領丹陽太守討故太守周昕遂據其郡
孫策與孫河呂範依景合衆共討涇縣山賊祖郎郎敗
走會景為劉繇所迫復北依術術以為督軍中郎將與
孫賁共討樊能于麋於橫江又擊笮融薛禮於秣陵時
策被創牛渚降賊復反景攻討盡禽之從討劉繇繇奔
豫章策遣景賁到壽春報術術方與劉備爭徐州以景
為廣陵太守術後僭號策以書喻術術不納便絕江津
不與通使人告景景即委郡東歸策復以景為丹陽太

守漢遺議郎王誦

晉音

銜命南行表景為揚武將軍領郡

如故及權少年統業夫人助治軍國甚有補益

會稽典錄曰策

功曹魏騰以逆意見譴將殺之士大夫憂恐計無所出夫人乃倚大井而謂策曰汝新造江南其事未集方當優賢禮士捨過錄功魏功曹在公盡規汝今日殺之則明日人皆叛汝吾不忍見禍之及當先投此井中耳策大驚遽釋騰夫人智

建安七年臨薨引見張昭等屬以

後事合葬高陵

志林曰案會稽貢舉簿建安十二年到十三年闕無舉者云府君遭憂此則吳

后以十二年薨也八年九年皆有貢舉斯甚分明

八年景卒官子奮授兵為將

封新亭侯卒

吳書曰權征荊州拜奮吳郡都督以鎮東方

子安嗣安坐黨魯

王霸死奮弟祺

吳書曰祺與張溫顧譚友善權令闕平辭訟事

封都亭侯卒子

纂嗣纂妻即滕胤女也胤被誅并遇害

吳主權謝夫人會稽山陰人也父熹漢尚書郎徐令

熹子

承撰後漢書稱熹幼以仁孝為行明達有令才熹弟貞履蹈法度篤學尚義舉孝廉建昌長卒官

權母

吳為權聘以為妃愛幸有寵後權納姑孫徐氏欲令謝

下之謝不肯由是失志早卒後十餘年弟承拜五官郎

中稍遷長沙東部都尉武陵太守撰後漢書百餘卷

會稽

典錄曰承字偉平博學洽聞嘗所知見終身不忘子崇揚威將軍崇弟勗吳郡太守並知名

吳主權徐夫人吳郡富春人也祖父真與權父堅相親
堅以妹妻真生琨琨少仕州郡漢末擾亂去吏隨堅征
伐有功拜偏將軍堅薨隨孫策討樊能于麋等於橫江
擊張英於當利口而船少欲駐軍更求琨母時在軍中
謂琨曰恐州家多發水軍來逆人則不利矣如何可駐
邪宜伐蘆葦以為汭佐船渡軍

汭音敷郭璞注方
言曰汭水中薄也

琨具

啟策策即行之衆悉俱濟遂破英擊走笮融劉繇事業
克定策表琨領丹陽太守會吳景委廣陵來東復為丹

陽守

江表傳曰初袁術遣從弟胤為丹陽策令琨討而代之會景還以景前任仕丹陽寬仁得衆吏民所

思而琨手下兵多策嫌其太重且方攻伐宜得琨衆乃復用景召琨還矣琨以督軍中郎將

領兵從破廬江太守李術封廣德侯遷平虜將軍後從

討黃祖中流矢卒琨生夫人初適同郡陸尚尚卒權為

討虜將軍在吳聘以為妃使母養子登後權遷移以夫

人妬忌廢處吳積十餘年權為吳王及即尊號登為太

子羣臣請立夫人為后權意在步氏卒不許後以疾卒

兄矯嗣父琨侯討平山越拜偏將軍先夫人卒無子弟

祚襲封亦以戰功至于蕪湖督平魏將軍

吳主權步夫人臨淮淮陰人也與丞相隲同族漢末其
母攜將徙廬江廬江為孫策所破皆東渡江以美麗得
幸於權寵冠後庭生二女長曰魯班字大虎前配周瑜
子循後配全琮少曰魯育字小虎前配朱據後配劉纂
吳歷曰纂先尚權中女早
卒故又以小虎為繼室 夫人性不妬忌多所推進故

久見愛待權為王及帝意欲以為后而羣臣議在徐氏
權依違者十餘年然宮內皆稱皇后親戚上疏稱中宮

及薨臣下緣權指請追正名號乃贈印綬策命曰惟赤
烏元年閏月戊子皇帝曰嗚呼皇后惟后佐命共承天
地虔恭夙夜與朕均勞內教脩整禮義不愆寬容慈惠
有淑懿之德民臣縣望遠近歸心朕以世難未夷大統
未一緣后雅志每懷謙損是以于時未授名號亦必謂
后降年有永永與朕躬對揚天休不寤奄忽大命近止
朕恨本意不早昭顯傷后殂逝不終天祿愍悼之至痛
于厥心今使使持節丞相醴陵亭侯雍奉策授號配食

先后魂而有靈嘉其寵榮嗚呼哀哉葬於蔣陵

吳主權王夫人琅邪人也

吳書曰夫人父名盧九

夫人以選入宮

黃武中得幸生孫和寵次步氏步氏薨後和立為太子
權將立夫人為后而全公主素憎夫人稍稍譖毀及權
寢疾言有喜色由是權深責怒以憂死和子皓立追尊
夫人曰大懿皇后封三弟皆列侯

吳主權王夫人南陽人也以選入宮嘉禾中得幸生孫
休及和為太子和母貴重諸姬有寵者皆出居外夫人

出公安卒因葬焉休即位遣使追尊曰敬懷皇后改葬敬陵王氏無後封同母弟文雍為亭侯

吳主權潘夫人會稽句章人也父為吏坐法死夫人與姊俱輸織室權見而異之召克後宮得幸有娠夢有以龍頭授已者已以蔽膝受之遂生孫亮赤烏十三年亮立為太子請出嫁夫人之姊權聽許之明年立夫人為皇后性險妬容媚自始至卒譖害袁夫人等甚衆

吳錄曰袁

夫人者素術女也有節行而無子權數以諸姬子與養之輒不育及步夫人薨權欲立之夫人自以無子固辭

不權不豫夫人使問中書令孫弘呂后專制故事侍疾受疲勞因以羸疾諸宮人伺其昏卧共縊殺之託言中惡後事泄生死者六七人權尋薨合葬蔣陵孫亮即位以夫人姊壻譚紹為騎都尉授兵亮廢紹與家屬送本郡廬陵

孫亮全夫人全尚女也尚從祖母公主愛之每進見輒與俱及潘夫人母子有寵全主自以與孫和母有隙乃勸權為潘氏男亮納夫人亮遂為嗣夫人立為皇后以

尚為城門校尉封都亭侯代滕胤為太常衛將軍進封

永平侯錄尚書事時全氏侯有五人並典兵馬其餘為

侍郎騎都尉宿衛左右自吳興外戚貴盛莫及及魏大

將諸葛誕以壽春來附而全懌全端全裒全儀等並因

此際降魏全熙謀泄見殺由是諸全衰弱會孫綝廢亮

為會稽王後又黜為候官侯夫人隨之國居候官尚將

家屬徙零陵道見殺

吳錄曰亮妻惠解有容色居候官吳平乃歸永寧中卒

孫休朱夫人朱據女休姊公主所生也

臣松之以為休妻其甥事同漢

惠荀悅譏之已當故不復廣言赤烏末權為休納以為妃休為琅邪王

隨居丹陽建興中孫峻專政公族皆患之全尚妻即峻姊故惟全主祐焉初孫和為太子時全主譖害王夫人欲廢太子立魯王朱主不聽由是有隙五鳳中孫儀謀殺峻事覺被誅全主因言朱主與儀同謀峻枉殺朱主休懼遣夫人還建業執手泣別既至峻遣還休太平中孫亮知朱主為全主所害問朱主死意全主懼曰我實不知皆據二子熊損所白亮殺熊損損妻是峻妹也孫

緄益忌亮遂廢亮立休永安五年立夫人為皇后休卒
羣臣尊夫人為皇太后孫皓即位月餘貶為景皇后稱

安定宮甘露元年七月見逼薨合葬定陵

搜神記曰孫峻殺朱主埋

於石子岡歸命即位將欲改葬之冢墓相亞不可識別
而宮人頗識主亡時所著衣服乃使兩巫各住一處以
伺其靈使察鑒之不得相近久時二人俱白見一女人
年可三十餘上着青錦束頭紫白袷裳丹綈絲履從石
子岡上半岡而以手抑膝長太息小住須臾進一冢上
便止徘徊良久奄然不見二人之言不謀而同於是開
冢衣服如之

孫和何姬丹陽句容人也父遂本騎士孫權嘗游幸諸

營而姬觀於道中權望見異之命宦者召入以賜子和

生男權喜名之曰彭祖即皓也太子和既廢後為南陽

王居長沙孫亮即位孫峻輔政峻素媚事全主全主與

和母有隙遂勸峻徙和居新都遣使賜死嫡妃張氏亦

自殺何姬曰若皆從死誰當養孤遂拊育皓及其三弟

皓即位尊和為昭獻皇帝

吳錄曰皓初尊和為昭獻皇帝俄改曰文皇帝何姬

為昭獻皇后稱升平宮月餘進為皇太后封弟洪永平

侯蔣溧陽侯植宣成侯洪卒子邈嗣為武陵監軍為晉

所殺植官至大司徒吳末昏亂何氏驕僭子弟橫放百

姓患之故民謠言皓久死立者何氏子云

江表傳曰皓以張布女為

美人有寵皓問曰汝父所在答曰賊以殺之皓大怒棒殺之後思其顏色使巧工刻木作美人形象恒置座側問左右布復有女否答曰布大女適故衛尉馮朝子純即奪純妻入宮大有寵拜為左夫人晝夜與夫人房宴不聽朝政使尚方以金作華燧步搖假髻以千數令宮人著以相撲朝成夕敗輒出更作工匠因緣偷盜府藏為空會夫人死皓哀愍思念葬于苑中大作冢使工匠刻栢作木人內冢中以為兵衛以金銀珍玩之物送葬不可稱計已葬之後皓治喪於內半年不出國人見葬大奢麗皆謂皓已死所葬者是也皓舅子何都顏狀似皓云都代立臨海太守奚熙信謠言舉兵欲還誅都都叔父信時為備海督擊殺熙夷三族謠言乃息而人心

猶疑

孫皓滕夫人故大常胤之族女也胤夷滅夫人父牧以
疏遠徙邊郡孫休即位大赦得還以牧為五官中郎皓
既封烏程侯聘牧女為妃皓即位立為皇后封牧高密
侯拜衛將軍錄尚書事後朝士以牧尊戚頗推令諫爭
而夫人寵漸衰皓滋不悅皓母何恒左右之又太史言
於運厯后不可易皓信巫覡故得不廢常供養升平宮
牧見遣居蒼梧郡雖爵位不奪其實裔也遂道路憂死

長秋官僚備員而已受朝賀表疏如故而皓內諸寵姬

佩皇后璽紱者多矣

江表傳曰皓又使黃門備行州郡科取將吏家女其二千石大臣子

女皆當歲歲言名年十五六一簡閱簡閱不中乃得出嫁後宮千數而採擇無已

天紀四年隨

皓遷于洛陽

評曰易稱正家而天下定詩云刑于寡妻至于兄弟以御于家邦誠哉是言也遠觀齊桓近察孫權皆有識士之明傑人之志而嫡庶不分閨庭錯亂遺笑古今殃流後嗣由是論之惟以道義為心平一為主者然後克免

斯累邪

吳志卷五

吳志卷五考證

孫破虜吳夫人甚有補益注策功曹魏騰○太平御覽

作魏勝臣明楷

按吳範傳作魏滕注引忤策幾殆賴

太妃救得免事與此合蓋騰與滕音同勝則滕字之

謠耳

吳主權徐夫人復為丹陽守注乃復用景召琨還矣○

還矣宋本作還吳

弟祚襲封亦以戰功至于蕪湖督平魏將軍○漢丹楊

郡蕪湖縣東晉始改名于湖此于字疑衍

吳主權潘夫人夢有以龍頭授已者○以毛本作似
孫亮全夫人尚將家屬徙零陵道見殺○道宋本作追
孫和何姬植宣成侯○北宋本作宣城

立者何氏子云注臨海太守奚熙信謫言舉兵欲還誅
都都叔父信時為備海督擊殺熙○宋本作舉兵欲
還秣陵誅都多秣陵二字都叔父信作都叔父植
吳志卷五考證

吳志卷六

晉著作郎巴西中正安漢陳壽撰

宋太中大夫國子博士聞喜裴松之注

孫靜

子瑜

皎

孫賁

子隣

孫輔

孫翊

孫

匡 孫韶 孫桓

孫靜字幼臺堅季弟也堅始舉事靜糾合鄉曲及宗室五六百人以為保障衆咸附焉策破劉繇定諸縣進攻

會稽遣人請靜靜將家屬與策會于錢唐是時太守王
朗拒策於固陵策數度水戰不能克靜說策曰朗負阻
城守難可卒拔查瀆南去此數十里而道之要徑也宜
從彼據其內所謂攻其無備出其不意者也吾當自帥
衆為軍前隊破之必矣策曰善乃詐令軍中曰頃連雨
水濁兵飲之多腹痛令促具甕缶數百口澄水至昏暮
四維然火誑朗便分軍夜投查瀆道襲高遷屯

臣松之
案今永

興縣有高遷橋
查音祖加反

朗大驚遣故丹陽太守周昕等帥兵前

戰策破昕等斬之遂定會稽

會稽典錄曰昕字大明少游京師師事太傅陳蕃博

覽羣書明於風角善推災異辟太尉府舉高第稍遷丹陽太守曹公起義兵昕前後遣兵萬餘人助公征伐袁術之在淮南也昕惡其淫虐絕不與通獻帝春秋曰袁術遣吳景攻昕未拔景乃募百姓敢從周昕者死不赦

昕曰我則不德百姓何罪遂散兵還本郡

表拜靜為奮武校尉欲授之重任

靜戀墳墓宗族不樂出仕求留鎮守策從之權統事就遷昭義中郎將終於家有五子嵩瑜皎與謙嵩三子綽超恭超為偏將軍恭生峻綽生緄

瑜字仲異以恭義校尉始領兵衆是時賓客諸將多江

西人瑜虛心綏撫得其歡心建安九年領丹陽太守為
衆所附至萬餘人加綏遠將軍十一年與周瑜共討麻
保二屯破之後從權拒曹公於濡須權欲交戰瑜說權
持重權不從軍果無功遷奮威將軍領郡如故自溧陽
徙屯牛渚瑜以永安人饒助為襄安長無錫人顏連為
居巢長使招納廬江二郡各得降附濟陰人馬普篤學
好古瑜厚禮之使二府將吏子弟數百人就受業遂立
學宮臨饗講肄是時諸將皆以軍務為事而瑜好樂墳

典雖在戎旅誦聲不絕年三十九建安二十年卒瑜五子彌熙耀曼紘曼至將軍封侯

孫皎字叔朗始拜護軍校尉領衆二千餘人是時曹公數出濡須皎每赴拒號為精銳遷都護征虜將軍代程普督夏口黃蓋及兄瑜卒又并其軍賜沙羨雲杜南新市竟陵為奉邑自置長吏輕財能施善於交結與諸葛瑾至厚委廬江劉靖以得失江夏李允以衆事廣陵吳碩河南張梁以軍旅而傾心親待莫不自盡皎嘗遣兵

候獲魏邊將吏美女以進皎皎更其衣服送還之下令
曰今所誅者曹氏其百姓何罪自今以往不得擊其老
弱由是江淮間多歸附者嘗以小故與甘寧忿爭或以
諫寧寧曰臣子一例征虜雖公子何可專行侮人邪吾
值明主但當輸効力命以報所天誠不能隨俗屈曲矣
權聞之以書讓皎曰自吾與北方為敵中間十年初時
相持年小今者且三十矣孔子言三十而立非但謂五
經也授卿以精兵委卿以大任都護諸將於千里之外

欲使如楚任昭奚恤揚威於北境非徒相使逞私志而
已近聞卿與甘興霸飲因酒發作侵陵其人其人求屬
呂蒙督中此人雖麤豪有不如人意時然其較畧大丈
夫也吾親之者非私之也吾親愛之卿踈憎之卿所為
每與吾違其可久乎夫居敬而行簡可以臨民愛人多
容可以得衆二者尚不能知安可董督在遠禦寇濟難
乎卿行長大特受重任上有遠方瞻望之視下有部曲
朝夕從事何可恣意有盛怒邪人誰無過貴其能改宜

追前愆深自咎責今故煩諸葛子瑜重宣吾意臨書推
愴心悲淚下皎得書上疏陳謝遂與寧結厚後呂蒙當
襲南郡權欲令皎與蒙為左右部大督蒙說權曰若至
尊以征虜能宜用之以蒙能宜用蒙昔周瑜程普為左
右部督共攻江陵雖事決於瑜普自恃久將且俱是督
遂共不睦幾敗國事此目前之戒也權寤謝蒙曰以卿
為大督命皎為後繼禽關羽定荊州皎有力焉建安二
十四年卒權追錄其功封子胤為丹陽侯胤卒無子弟

晞嗣領兵有罪自殺國除弟咨彌儀皆將軍封侯咨羽
林督儀無難督咨為滕胤所殺儀為孫峻所害

孫奐字李明兄皎既卒代統其衆以揚武中郎將領江
夏太守在事一年遵皎舊迹禮劉靖李允吳碩張梁及
江夏閭舉等並納其善奐訥於造次而敏於當官軍民
稱之黃武五年權攻石陽奐以地主使所部將軍鮮于
丹帥五千人先斷淮道自帥吳碩張梁五千人為軍前
鋒降高城得三將大軍引還權詔使在前往駕過其軍

見吳軍陣整齊權歎曰初吾憂其遲鈍今治軍諸將少能及者吾無憂矣拜揚威將軍封沙羨侯吳碩張梁皆

裨將軍賜爵關內侯

江表傳曰初權在武昌欲還都建業而慮水道汭流二千里一旦有

警不相赴及以此懷疑及至夏口於塢中大會百官議之詔曰諸將吏勿拘位任其有計者為國言之諸將或陳宜立柵夏口或言宜重設鐵鎖者權皆以為非計時梁為小將未有知名乃越席而進曰臣聞香餌引泉魚重幣購勇士今宜明樹賞罰之信遣將入沔與敵爭利形勢既成彼不敢干也使武昌有精兵萬人付智畧者任將常使嚴整一旦有警應聲相赴作甘水城輕艦數千諸所宜用皆使備具如此開門延敵敵自不來矣權以梁計為最得即超增梁 貞亦愛樂儒生復命部曲子位後稍以功進至沔中督

弟就業後仕進朝廷者數十人年四十嘉禾三年卒子

承嗣以昭武中郎將代統兵領郡赤烏六年卒無子封

承庶弟壹奉奐後襲業為將孫峻之誅諸葛恪也壹與

全熙施績攻恪弟公安督融融自殺壹從鎮南遷鎮軍

假節督夏口及孫綝誅滕胤呂據據胤皆壹之妹夫也

壹弟封又知胤據謀自殺綝遣朱異潛襲壹異至武昌

壹知其攻已率部曲千餘口過將胤妻奔魏魏以壹為

車騎將軍儀同三司封吳侯以故主芳貴人邢氏妻之

邢美色妬忌下不堪命遂共殺壹及邢氏壹入魏黃初三年死

孫賁字伯陽父羗字聖壹堅同產兄也賁早失二親弟輔嬰孩賁自贍育友愛甚篤為郡督郵守長堅於長沙舉義兵賁去吏從征伐堅薨賁攝帥餘衆扶送靈柩後袁術徙壽春賁又依之術從兄紹用會稽周昂為九江太守紹與術不協術遣賁攻破昂於陰陵術表賁領豫州刺史轉丹陽都尉行征虜將軍討平山越為揚州刺

史劉繇所迫逐因將士衆還住歷陽頃之術復使賁與
吳景共擊樊能張英等未能拔及策東渡助賁景破英
能等遂進擊劉繇繇走豫章策遣賁景還壽春報術值
術僭號署置百官除賁九江太守賁不就棄妻孥還江
南江表傳曰袁術以吳景守廣陵策族兄香亦為術所用
用作汝南太守而令賁為將軍領兵在壽春策與景
等書曰今征江東未知二三君意云何耳景即棄守歸
賁因而獲免香以道遠獨不得還吳書曰香字文陽父
儒字仲孺堅再從弟也仕郡主簿功曹香從堅征伐
有功拜郎中後為袁術驅馳加征南將軍死於壽春時
策已平吳會二郡賁與策征廬江太守劉勲江夏太守

黃祖軍旋聞繇病死過定豫章上賁領太守

江表傳曰時丹陽僮

芝自署廬陵太守策留賁弟輔領兵住南昌策謂賁曰兄今據豫章是扼僮芝咽喉而守其門戶矣但當伺其形便因令國儀杖兵而進使公瑾為作勢援一舉可定也後賁聞芝病即如策計周瑜到巴丘輔遂得進據廬

陵後封都亭侯建安十三年使者劉隱奉詔拜賁為征

虜將軍領郡如故在官十一年卒子鄰嗣鄰年九歲代

領豫章進封都鄉侯

吳書曰鄰字公達雅性精敏幼有令譽

在郡垂二十

年討平叛賊政績修理召還武昌為繞帳督時太常潘

濬掌荊州事重安長陳留舒燮有罪下獄濬嘗失燮欲

寘之於法論者多有為言濬猶不釋鄰謂濬曰舒伯膺

兄弟爭死海內義之以為美譚仲膺又有奉國舊意今

君殺其子弟若天下一統青蓋北巡中州士人必問仲

膺繼嗣答者云潘承明殺變於事何如濬意即解變用

得濟

博物志曰仲膺名邵初伯膺親友為人所殺仲膺為報怨事覺兄弟爭死皆得免袁術時邵為阜陵

長亦見江表傳

鄰遷夏口沔中督威遠將軍所居任職赤烏十

二年卒子苗嗣苗弟旅及叔父安熙績皆歷列位

吳歷曰鄰

又有子曰述為武昌督平荆州事震無難督諧城門校尉歆樂鄉督震後禦晉軍與張悌俱死賁曾孫惠字德

施惠別傳曰惠好學有才智晉永寧元年赴齊王冏義以功封晉興侯辟大司馬賊曹屬冏驕矜僭侈天下失望惠獻言於冏諷以五難四不可勸令委讓萬機歸藩青岱辭甚深切冏不能納頃之果敗成都王穎召為大將軍參軍是時穎將有事於長沙以陸機為前鋒都督惠與機鄉里親厚憂其致禍謂之曰子盍讓都督於王粹乎機曰將謂吾避賊首鼠更速其害機尋被戮二弟雲眈亦見殺惠甚傷恨之永興元年乘輿幸鄴司空東海王越治兵下邳惠以書干越說其姓名自稱南岳逸民秦秘之勉以勤王匡世之畧辭義甚美越省其書榜題道衡推求其人惠乃出見越即以為記室參軍專掌文疏豫參謀議每造書檄越或驛馬催之應命立成皆有辭旨累遷顯職後為廣武將軍安豐內史年四十七卒惠文翰凡數十首

孫輔字國儀賁弟也以揚武校尉佐孫策平三郡策討

丹陽七縣使輔西屯歷陽以拒袁術并招誘餘民鳩合

遺散又從策討陵陽生得祖郎等

江表傳曰策既平定江東逐袁胤袁術深

怨策乃陰遣間使齎印綬與丹陽宗帥陵陽祖郎等使激動山越大合衆圖共攻策策自率將士討郎生獲之策謂郎曰爾昔襲擊孤斫孤馬鞍今創軍立事除棄宿恨惟取能用與天下通耳非但汝汝莫恐怖郎叩頭謝罪即破械賜衣服署門下賊曹及軍還郎與太史慈俱在前導軍人以為榮策西襲廬江太

守劉勲輔隨從身先士卒有功策立輔為廬陵太守撫

定屬城分置長吏遷平南將軍假節領交州刺史遣使

與曹公相間事覺權幽繫之

典畧曰輔恐權不能保守江東因權出行東治乃遣

人齋書呼曹公行人以告權乃還偽若不知與張昭共見輔權謂輔曰兄厭樂邪何為呼他人輔云無是權因投書與昭昭示輔輔慙無辭乃悉數歲卒子興昭偉昕斬輔親近分其部曲徙輔置東

皆歷列位

孫翊字叔弼權弟也驍悍果烈有兄策風太守朱治舉

孝廉司空辟

典畧曰翊名儼性似策策臨卒張昭等謂策當以兵屬儼而策呼權佩以印綬

建

安八年以偏將軍領丹陽太守時年二十後卒為左右

邊鴻所殺鴻亦即誅

吳歷載翊妻徐節行宜與媽覽等事相次故列於後孫韶傳中

子

松為射聲校尉都鄉侯

吳錄曰松善與人交輕財好施鎮巴丘數咨陸遜以得失嘗有

小過遯面責松松意色不平遯觀其少釋謂曰君過聽不以某鄙數見訪及是以承來意進盡言便變色何也松笑曰屬亦自忿行

黃龍三年卒蜀丞相諸葛亮與兄

瑾書曰既受東朝厚遇依依於子弟又子喬良器為之惻愴見其所與亮器物感用流涕其悼松如此由亮養子喬咨述故云

孫匡字季佐翊弟也舉孝廉茂才未試用卒時年二十

餘江表傳曰魯休出洞口呂範率軍禦之時匡為定武中郎將遣範令放火燒損茅芒以乏軍用範即啟送

匡還吳權別其族為丁氏禁固終身臣松之案本傳曰匡未試用卒時年二十餘而江表傳云呂範在洞口匡

為定武中郎將既為定武非為未試用且孫堅以初平二年卒洞口之役在黃初三年堅卒至此合三十一年匡時若尚在本傳不得云卒時年二十餘也此蓋權別生弟朗江表傳誤以為匡也朗之名位見三朝錄及虞喜志

子秦曹氏之甥也為長水校尉嘉禾三年從權圍

新城中流矢死秦子秀為前將軍夏口督秀公室至親握兵在外皓意不能平建衡二年皓遣何定將五千人至夏口獵先是民間僉言秀當見圖而定遠獵秀遂驚夜將妻子親兵數百人奔晉晉以秀為驃騎將軍儀同

三司封會稽公

江表傳曰皓大怒追改秀姓曰厲干寶晉紀曰秀在晉朝初聞皓降羣臣畢賀

秀稱疾不與南向流涕曰昔討逆弱冠以一校尉創業今後主舉江南而棄之宗廟山陵於此為墟悠悠蒼天此何人哉朝廷美之晉諸公贊曰吳平降為伏波將軍開府如故永寧中卒追贈驃騎開府子儉字仲節給事中

孫韶字公禮伯父河字伯海本姓俞氏亦吳人也孫策

愛之賜姓為孫列之屬籍

吳書曰河堅族子也出後姑俞氏後復姓為孫河質性忠

直訥言敏行有氣幹能服勤少從堅征討常為前驅後領左右兵典知內事待以腹心之任又從策平定吳會從權討李術術破拜威後為將軍屯京城初孫權殺吳

寇中郎將領盧江太守

郡太守盛憲

會稽典錄曰憲字孝章器量雅偉舉孝廉補尚書郎稍遷吳郡太守以疾去官孫策

平定吳會誅其英豪憲素有高名策深忌之初憲與少府孔融善融憂其不免禍乃與曹公書曰歲月不居時

節如流五十之年忽焉已至公為始滿融又過二海內
知識零落殆盡惟會稽盛孝章尚存其人困於孫氏妻
孥湮沒單孑獨立孤危愁苦若使憂能傷人此子不得
復永年矣春秋傳曰諸侯有相滅亡者桓公不能救則
桓公耻之今孝章實丈夫之雄也天下譚士依以揚聲
而身不免於幽執命不期於旦夕是吾祖不當復論損
益之友而朱穆所以絕交也公誠能馳一介之使加咫尺之書則孝章可致友道可弘也今之少年喜謗前輩
或能譏平賊柄孝章孝章要為有天下大名九牧之民
所共稱歎燕君市駿馬之骨非欲以騁道里乃當以招
絕足也惟公匡復漢室宗社將絕又能正之正之之術
實須得賢珠玉無脛而自至者以人好之也况賢者之
有足乎昭王築臺以尊郭隗隗雖小才而逢大遇竟能
發明主之至心故樂毅自魏往劇辛自趙往鄒衍自齊
往嚮使郭隗倒縣而王不解臨溺而王不拯則士亦將
高翔遠引莫有北首燕路者矣凡所稱引自公所知而

有云者欲公崇篤斯義也因表不悉由是徵為騎都尉制命未至果為權所害子匡奔魏位至征東司馬憲

故孝廉矯覽戴員亡匿山中孫翊為丹陽皆禮致之覽

為大都督督兵員為郡丞及翊遇害河馳赴宛陵責怒

覽員以不能全權令使奸變得施二人議曰伯海與將

軍疎遠而責我乃爾討虜若來吾屬無遺矣遂殺河使

人北迎揚州刺史劉馥令往歷陽以丹陽應之會翊帳

下徐元孫高傳嬰等殺覽員

吳歷曰矯覽戴員親近邊鴻等數為翊所困常欲叛

逆因吳主出征遂其奸計時諸縣令長並會見翊翊以妻徐氏頗曉卜翊入語徐吾明日欲為長吏作主人卿

試卜之徐言卦不能佳可須異日翊以長吏來久宜速遣乃大請賓客翊出入常持刀爾時有酒色空手送客鴻從後斫翊郡中擾亂無救翊者遂為鴻所殺迸走入山徐氏購募追捕中宿乃得覽員歸罪殺鴻諸將皆知覽員所為而力不能討覽入居軍府中悉取翊嬪妾及左右侍御欲復取徐恐逆之見害乃紿之曰乞須晦日設祭除服時月垂竟覽聽須祭畢徐潛使所親信語翊親近舊將孫高傅嬰等說覽已虜畧婢妾今又欲見偏所以外許之者欲安其意以免禍耳欲立微計願二君哀救高嬰涕泣答言受府君恩遇所以不即死難者以死無益欲思惟事計事計未立未敢啓夫人耳今日之事實夙夜所懷也乃密呼翊時侍養者二十餘人以徐意語之共盟誓合謀到晦日設祭徐氏哭泣盡哀畢乃除服薰香沐浴更於他室安施幃帳言笑歡悅示無戚容大小悽愴怪其如此覽密覘視無復疑意徐呼高嬰與諸婢羅住戶內使人報覽說已除凶即吉惟府君勅

命覽盛意入徐出戶拜覽適得一拜徐便大呼二君可
起高嬰俱出共得殺覽餘人即就外殺員夫人乃還縗
經奉覽員首以祭塋墓舉軍震駭以為神異吳主續至
悉族誅覽員餘黨擢高嬰為牙門其餘皆加賜金帛殊
其門

戶 韶年十七收河餘衆繕治京城起樓櫓修器備以
禦敵權聞亂從椒丘還過定丹陽引軍歸吳夜至京城
下營試攻驚之兵皆乘城傳檄備警謹聲動地頗射外
人權使曉喻乃止明日見韶甚器之即拜承烈校尉統
河部曲食曲阿丹徒二縣自置長吏一如河舊後為廣
陵太守偏將軍權為吳王遷揚威將軍封建德侯權稱

尊號為鎮北將軍韶為邊將數十年善養士卒得其死力常以警疆場遠斥堠為務先知動靜而為之備故鮮有負敗青徐汝沛頗來歸附淮南濱江屯候皆撤兵遠徙徐泗江淮之地不居者各數百里自權西征還都武昌韶不進見者十餘年權還建業乃得朝覲權問青徐諸屯要害遠近人馬衆寡魏將帥姓名盡具識之所問咸對身長八尺儀貌都雅權歡悅曰吾久不見公禮不圖進益乃爾加領幽州牧假節赤烏四年卒子越嗣至

右將軍越兄楷武衛大將軍臨成侯代越為京下督楷
弟異至領軍將軍弈宗正卿恢武陵太守天璽元年徵
楷為宮下鎮驃騎將軍初永安賊施但等劫皓弟謙襲
建業或白楷二端不即赴討者皓數遣詰楷楷常惶怖
而卒被召遂將妻子親兵數百人歸晉晉以為車騎將
軍封丹陽侯

晉諸公贊曰吳平降為渡遼將軍永安元
年卒吳錄曰楷處事嚴整不如孫秀而人

間知名
過也

孫桓字叔武河之子也

吳書曰河有四子長助曲阿長
次誼海鹽長並早卒次桓儀容

端正器懷聰朗博學彊記能論議應對權常稱為宗室
顏淵擢為武衛都尉從討關羽於華容誘羽餘黨得五
千人牛馬器械甚衆年二十五拜安東中郎將與陸遜共拒劉備

備軍衆甚盛彌山盈谷桓投刀奮命與遜勦力備遂敗
走桓斬上兜道截其徑要備踰山越險僅乃得免忿恚
歎曰吾昔初至京城桓尚小兒而今迫孤乃至此也桓
以功拜建武將軍封丹徒侯下督牛渚作橫江塢會卒

吳書曰桓弟俊字叔英性度恢弘才經文武為定武中
郎將屯戍薄落赤烏十三年卒長子建襲爵平虜將軍
少子慎鎮南將軍慎子丞字顯世文士傳曰丞好學有
文章作螢火賦行於世為黃門侍郎與顧榮俱為侍臣

歸命世內侍多得罪尤惟榮丞獨獲全常使二人記事
丞答顧問乃下詔曰自今已後用侍郎皆當如今宗室
丞顧榮疇也吳平赴洛為范陽涿令甚有稱績永安
中陸機為成都王大都督請丞為司馬與機俱被害

評曰夫親親恩義古今之常宗子維城詩人所稱況此
諸孫或贊興初基或鎮據邊陲克堪厥任不忝其榮者
乎故詳著云

吳志卷六

吳志卷六考證

孫靜令促具甕缶數百口澄水至昏暮四維然火誑朗
○四維然火宋本作羅以然火

壹入魏黃初三年死○臣明楷按孫亮傳云太平二年

夏口督孫壹奔魏魏志高貴鄉公紀云甘露二年魏
以壹為侍中車騎將軍假節交州牧吳侯四年十一
月癸卯車騎將軍孫壹為婢所殺此云黃初三年死
疑誤黃初二字或衍蓋壹以甘露二年奔魏甘露四

年死適當三年則云壹入魏三年死于文義亦合也
孫賁賁不就棄妻孥還江南注景即棄守歸賁因而獲
免○監本訛作因而後免今改正

鄰年九歲代領豫章進封都鄉侯○九歲無領郡理疑
脫十字

濬嘗失變欲寘之於法論者多有為言○監本訛作多
為有言今改正

孫翊子松為射聲校尉都鄉侯注君過聽不以某鄙數

見訪及○監本訛作不以其鄙今改正

孫匡秀公室至親握兵在外○握兵毛本作提兵宋本作捉兵

孫桓作橫江塢會卒注慎子丞字顯世○丞晉書作拯下同

又注皆當如今宗室○太平御覽作皆當令如宗室

吳志卷六考證


謹案卷四第九頁前四行古人報主以死刊本主訛生據毛本改

第十頁前一行慈引弓射之刊本引訛以據毛本改

考證二頁前四行蓋謂捧其頤刊本頤訛頭據上文改

卷五第二頁後八行注吳書曰刊本書訛主據監本改

卷六第十一頁後四行公誠能馳一介之使刊本
馳訛持據毛本改



覆校官助教臣金學詩

校對官修撰臣張書勲

謄錄監生臣宋鉉